


L40-4514

了翁上座講大藏及有
家書置之武州紫雲山
我微笑塔院直府中永
為學者不敢許出院內
當山三世鐵牛機謹誌



B 64853



卷上

卷上



佛說首楞嚴三昧經卷上

姚秦三藏鳩摩羅什譯

如是我聞一時佛在王舍城耆闍崛山中與大比丘僧三萬二千人俱菩薩摩訶薩七萬一千衆所知識得陀羅尼成就辯才樂說無盡安住三昧而不動轉善能了知無盡之慧得深法忍入深法門於諸無量阿僧祇劫所修善法皆悉成就摧伏衆魔降諸怨敵攝取最尊嚴淨佛土有大慈悲諸相嚴身於大精進得到彼岸善知一切言辭方便所行威儀具足清淨悉已得住三解脫門以無礙智通達三世發決定心

不捨一切憶念義趣堪忍智慧其諸菩薩德皆如是
其名曰轉不退轉法輪菩薩發心卽轉法輪菩薩無
礙轉法輪菩薩離垢淨菩薩除諸蓋菩薩示淨威儀
見皆愛喜菩薩妙相嚴淨王意菩薩不誑一切衆生
菩薩無量功德海意菩薩諸根常定不亂菩薩實音
聲菩薩一切天讚菩薩陀羅尼自在王菩薩辯才莊
嚴菩薩文殊師利法王子菩薩彌勒菩薩須彌頂王
菩薩海德寶嚴淨意菩薩大嚴菩薩大相菩薩光相
菩薩光德菩薩淨意菩薩喜王菩薩堅勢菩薩堅意
菩薩如是等菩薩摩訶薩七萬二十人及三千大千
世界所有釋梵護世天王并諸天龍夜叉乾闥婆阿
脩羅迦樓羅緊那羅摩睺羅伽人與非人衆所知識
多種善根樂大法者皆來集會爾時堅意菩薩在大
會中作是念言我於今者當問如來以是所問欲守
護佛種法種僧種令諸魔宮隱蔽不現摧伏自大增
上慢者未種善根者今當令種已種善根者當令增
長若有未發阿耨多羅三藐三菩提心者當令發心
已發心者令不退轉已不退者當令疾得阿耨多羅
三藐三菩提計有所得住諸見者皆悉令發捨離之
心樂小法者令不疑大法樂大法者令生歡喜作是

念已卽從座起偏袒右肩右膝著地合掌向佛白佛
言世尊我今欲於如來法中少有所問唯願聽許佛
告堅意隨汝所問吾當解說令汝歡喜堅意菩薩白
佛言世尊頗有三昧能令菩薩疾得阿耨多羅三藐
三菩提常得不離值見諸佛能以光明普照十方得
自在慧以破諸魔得自在智得自然智得無生智能
不隨他得不斷辯才盡未來際得如意足受無量命
乘者爲示大乘通達聲聞法而不入聲聞道通達辟
支佛法而不入辟支佛道通達佛法而不畢竟滅盡
示現聲聞形色威儀而內不離佛菩提心示現辟支
佛形色威儀而內不離佛大悲心以幻三昧力示現
如來形色威儀以善根力示現在於兜率天上現受
後身入於胎初生出家坐佛道場以深慧力現轉
法輪以方便力現入涅槃以三昧力現分舍利以本
願力現法滅盡唯然世尊行何三昧能令菩薩示現
如是諸功德事而不畢竟入於涅槃佛告堅意菩薩
言善哉善哉堅意能問如來如是之義當知汝能多
所饒益安樂衆生憐愍世間利安天人今世後世菩
薩蒙益當知汝已深種善根供養親近過去無量百

千億佛偏行諸道降魔怨敵於佛法中得自在智教化守護諸菩薩衆已知一切諸佛法藏曾於恒河沙等佛所成就問答堅意如來於此衆會之中不見天龍夜叉乾闥婆及諸聲聞求辟支佛者能作是問唯有汝等大莊嚴者乃能啓發如是之間汝今諦聽善思念之吾當爲汝說諸菩薩成就三昧得是功德復過於此堅意白佛言願樂欲聞佛告堅意有三昧名首楞嚴若有菩薩得是三昧如汝所問皆能示現於般涅槃而不永滅示諸形色而不壞色相偏遊一切諸佛國土而於國土無所分別悉能得值一切諸佛現行一切魔自在力而不依倚魔所行事偏行一切三界之中而於法相無所動轉示現偏生諸趣道中而不分別有諸道相善能解說一切法句以諸言辭開示其義而知文字入平等相於諸言辭無所分別常在禪定而現化衆生行於盡忍無生法忍而說諸法有生滅相獨步無畏猶如師子爾時會中諸釋梵護世天王一切大衆皆作是念我等猶尚未曾聞是三昧名字何況得聞解說其義今來見佛快得善利

皆共得聞說首楞嚴三昧名字若善男子善女人求佛道者聞首楞嚴三昧義趣信解不疑當知是人必於佛道不復退轉何況信已受持讀誦爲他人說如說修行時諸釋梵護世天王皆作是念我等今當爲佛如來敷師子座正法座大人座大莊嚴座大轉法輪座當令如來於我此座說首楞嚴三昧是中人人各各自謂唯我爲佛敷師子座餘人不能爾時釋梵護世天王各爲如來敷師子座莊校清淨端嚴高顯無量寶衣以敷其上悉皆張施衆妙寶蓋又以衆寶而爲欄楯於座左右無量寶樹枝葉間錯行列相當垂諸幢旛張大寶帳衆寶交絡懸諸寶鈴衆妙雜華以散其上諸天雜香燒以熏之金銀衆寶光明間錯種種嚴淨靡不具有須臾之間於如來前有八萬四千億那由他寶師子座悉於衆會無所妨礙一一天子不見餘座各作是念我獨爲佛敷師子座佛當於我所敷座上說首楞嚴三昧時諸釋梵護世天王敷座已竟各白佛言唯願如來坐我座上說首楞嚴三昧卽時世尊現大神力徧坐八萬四千億那由他師子座上諸天各各見佛坐其所敷座上不見餘座有一帝釋語餘釋言汝觀如來坐我座上如是釋梵護

世天王各相謂言汝觀如來坐我座上有一釋言如來今者但坐我座不在汝座

爾時如來以諸釋梵護世天王宿緣應度又欲少現首楞嚴三昧勢力亦爲成就大乘行故令諸衆會皆見如來徧在八萬四千億那由他寶師子座一切大衆皆大歡喜得未曾有各從座起合掌禮佛咸作是言善哉世尊威神無量令諸天子各滿所願其諸天子所爲如來施設座者見佛神力皆發阿耨多羅三藐三菩提心俱白佛言世尊我等爲欲供養如來滅除一切衆生苦惱守護正法不斷佛重是故皆發阿耨多羅三藐三菩提心願令我等於未來世住佛如是威神之力如今如來所作變現爾時佛讚諸天子言善哉善哉如汝所說爲欲利益一切衆生發阿耨多羅三藐三菩提心是爲第一供養如來時梵衆中有一梵王名曰等行白佛言世尊何等如來爲是真實坐我座上是餘座上是佛告等行一切諸法皆空如幻從和合有無有作者皆從憶想分別而起無有主故隨意而出是諸如來皆是真實云何爲實是諸如來本自不生是故爲實是諸如來今亦無滅是故爲實是諸如來非四大攝是故爲實諸陰入界皆所

不攝是故爲實是諸如來如先中後等無差別是故爲實梵王是諸如來等無差別所以者何是諸如來以色如故等以受想行識如故等以是故等是諸如來以過去世如故等以未來世如故等以現在世如故等以如幻法故等以如影法故等以無所有法故等以無所從來無所從去故等是故如來名爲平等如一切法等是諸如來亦復如是如一切衆生等是諸如來亦復如是如諸一切世間佛等是諸如來亦復如是如一切世界等是諸如來亦復如是是故諸佛名爲平等梵王是諸如來不過一切諸法如故名爲平等梵王當知如來悉知一切諸法如是平等是故如來於一切法名爲平等等行梵王白佛言未曾有也世尊如來得是諸法等已以妙色身示現衆生佛言梵王是皆首楞嚴三昧本行勢力之所致也是事故如來得此諸法等已以妙色身示現衆生說是法時等行梵王及萬梵天於諸法中得柔順忍爾時如來還攝神力諸佛及座皆不復現一切衆會唯見一佛爾時佛告堅意菩薩首楞嚴三昧非初地二地三地四地五地六地七地八地九地菩薩之所能得唯有住在十地菩薩乃能得是首楞嚴三昧何

等是首楞嚴三昧謂修治心猶如虛空一觀察現在衆生諸心二分別衆生諸根利鈍三決定了知衆生因果四於諸業中知無業報五入種種樂欲入已不忘六現知無量種種諸性七常能遊戲華音三昧能示衆生金剛心三昧一切禪定自在隨意八普觀一切所至諸道九於宿命智得無所礙十天眼無障十一得漏盡智非時不證十二於色無色得等入智十三於一切色示現遊戲十四知諸音聲猶如響相十五隨順入念慧十六能以善言悅可衆生十七隨應說法十八知時非時十九能轉諸根二十說法不虛二十順入真際二十善能攝伏衆生之類二十悉能具足諸波羅蜜二十威儀法性盡其邊際二十一時現身住一切佛所二十能進止未曾有異二十破諸憶想虛妄分別二十不壞身猶如影現三十善說諸乘度脫衆生常能護持三寶不絕三十能於現世發大莊嚴盡未來際而心未曾有疲倦想三十普於一切諸所生處常能現身隨時不絕三十於諸生處示有所作三十善能成就一切衆生三十善能識知一切衆生三十一切二乘不能測量三十善能具知諸音聲分三十能使一切諸法

熾盛

三十

能使一劫作阿僧祇劫

四

阿僧祇劫使作

一劫

四十

能使一國入阿僧祇國

四

十阿僧祇國使

入一國

四十

無量佛國入一毛孔

四

十一切衆生示

入一身

五十

了諸佛土同如虛空

六

十身能徧至無

餘佛土

四十

使一切身入於法性皆使無身

八

四十

切法性通達無相

四十

善能了知一切方便

五

一音

所說悉能通達

一切法性

五十演說一句能至無量

阿僧祇劫

五十

善觀一切法門差別

五

十善知同異

略廣說法

四十

善知出過一切魔道

五

十放大方便

智慧光明

六十

身口意業智慧爲首

五

十無行神通

常現在前

五十

以四無礙智能令一切衆生歡喜

十五

現神通力徧示

一切法性

六十能以攝法普攝衆生

六十解諸世間衆生語言

六十

於如幻法無有所疑

六十一切生處徧能自在

六十

所須之物隨意無乏

六十自在示現一切衆生

六十

於善惡者皆同福田

六十得入一切菩薩密法

六十

常放光照無餘世界

其智深遠無能測者

七十

其心猶如地水火風十七

善於諸法章句言辭而轉法輪

二十八

於如來地無所障礙

三

自然而得無生法忍

七十

得如實心諸煩惱垢所不能汙

五

使一切水入一毛孔不燒水

卷第十一

十一

白光山房藏

七

十一

性七十修集無量福德善根七十善知一切方便迴向七十善能變化徧行一切諸菩薩行七十佛一切法心得安隱八十已得捨離宿業本身八十能入諸佛祕密法藏八十示現自恣遊戲諸欲八十聞無量法具足能持四十求一切法心無厭足八十順諸世法而不滌汙八十於無量劫爲人說法皆令謂如從旦至食八十示現種種瘡殘跛蹇聾盲瘡痘以化衆生八十百千密跡金剛力士常隨護侍八十自然能觀知諸佛道九十能於一念示現無量無數劫壽九十現佛三昧九十若見若聞及觸共住皆能成就無量衆行一切二乘儀法而內不捨諸菩薩行二十其心善寂空無有相九十於衆妓樂現自娛樂而內不捨念生五十能於念念示成佛道隨本所化令得解脫十九大示現入胎初生九十出家成就佛道九十轉於法輪九十入大滅度而不永滅百堅意首楞嚴三昧如意首楞嚴三昧不以一事一緣一義可知一切禪定解脫三昧神通如意無礙智慧皆攝在首楞嚴中譬如波泉江河諸流皆入大海如是菩薩所有禪定皆在首楞嚴三昧譬如轉輪聖王有大勇將諸四種兵

皆悉隨從堅意如是所有三昧門禪定門辯才門解脫門陀羅尼門神通門明解脫門是諸法門悉皆攝在首楞嚴三昧隨有菩薩行首楞嚴三昧一切三昧皆悉隨從堅意譬如轉輪聖王行時七寶皆從如是堅意首楞嚴三昧一切助菩提法皆悉隨從是故此三昧名爲首楞嚴三昧佛告堅意菩薩住首楞嚴三昧不行求財而以布施大千世界及諸大海天宮人間所有寶物飲食衣服象馬車乘如是等物自在施與此皆是本功德所致況以神力隨意所作是名菩薩住首楞嚴三昧檀波羅蜜本事果報佛告堅意菩薩住首楞嚴三昧不復受戒於戒不動爲欲化導諸衆生故現受持戒行諸威儀示有所犯滅除過罪而內清淨常無闕失爲欲教化諸衆生故生於欲界作轉輪王諸眾女衆恭敬圍繞現有妻子五欲自恣而內常在禪定淨戒善能了見三有過患堅意是名菩薩住首楞嚴三昧尸波羅蜜本事果報佛告堅意菩薩住首楞嚴三昧修行忍辱畢竟盡故衆生不生而修於忍諸法不起而修於忍心無形色而修於忍不得彼我而修於忍不念生死而修於忍以涅槃性而修於忍不壞法性而修於忍菩薩如是修行忍辱而

無所修亦無不修爲化衆生生於欲界現有瞋恨而
內清淨現行遠離而無遠近爲淨衆生壞世威儀而
未曾壞諸法之性現有所忍而無有法常定不壞可
以忍者菩薩成就如是忍辱爲斷衆生多瞋恶心而
常稱歎忍辱之福亦復不得瞋恚忍辱堅意是名菩
薩住首楞嚴三昧羼提波羅蜜本事果報佛告堅意
菩薩住首楞嚴三昧發大精進得諸善法而不發動
身口意業爲懈怠者現行精進欲令衆生隨效我學
而於諸法無發無受所以者何菩薩悉知一切諸法
常住法性不來不去如是遠離身口意行而能示現
發行精進亦不見法有成就者現於世間發行精進
而於內外無所作爲常能往來無量佛國而於身相
平等不動示現發行一切善法而於諸法不得善惡
現行求法有所諮詢而於佛道不隨他教現行親近
和尚諸師而於一切諸天人等現勤請問而內自得
無障礙辯現行恭敬而爲一切天人戴仰現入胞胎
而於諸法無所染汙現有出生而於諸法不見生滅
現爲小兒而身諸根悉皆具足現行技藝醫方呪術
文章算數工巧事能而內先來皆悉通達現有病苦
而已永離諸煩惱患示現衰老而於先來諸根不壞

示現有死而未曾有生滅退失堅意是名菩薩住首楞嚴三昧精進波羅蜜本事果報佛告堅意菩薩住首楞嚴三昧雖知諸法常是定相而示衆生諸禪差別現身住禪化亂心者而於諸法不見有亂一切諸法如法性相以調伏心於禪不動現諸威儀來去坐卧而常寂然在於禪定示同衆人有所言說而常不捨諸禪定相慈愍衆生入於城邑聚落郡國而常在定爲欲饒益諸衆生故現有所食而常在定其身堅牢猶若金剛內實不虛不可破壞其內無有生藏熟藏大小便利臭穢不淨現有所食而無所入但爲慈愍饒益衆生於一切處無有過患現行一切凡夫所行而實無行已過諸行堅意菩薩住首楞嚴三昧現在空閑聚落無異現在居家出家無異現爲白衣而不放逸現爲沙門而不自高於諸外道出家法中爲化衆生而無所出家不爲一切邪見所染亦不於中謂得清淨現行一切外道儀法而不隨順其所行道堅意譬如導師將諸人衆過險道已還度餘人如是堅意菩薩住首楞嚴三昧隨諸衆生所發道意若聲聞道若辟支佛道若發佛道隨宜示導令得度已卽復來還度餘衆生是故大士名爲導師譬如牢船從

於此岸度無量人今至彼岸至彼岸已還度餘人如是堅意菩薩住首楞嚴三昧見諸衆生隨生死水四流所漂爲欲度脫令得出故隨其所種善根成熟若見可以緣覺度者卽爲現身示涅槃道若見可以聲聞度者爲說寂滅共入涅槃首楞嚴三昧力故還復現生度脫餘人是故大士名爲船師堅意譬如幻師於多衆前自現身死脛脹爛臭若火所燒鳥獸所食於衆人前如是現身得財物已而便還起以其善能學幻術故菩薩如是住首楞嚴三昧爲化衆生示現老死而實無有生老病死堅意是名首楞嚴三昧禪波羅蜜本事果報佛告堅意菩薩住首楞嚴三昧修行智慧諸根猛利未曾見有衆生之性爲欲化故說有衆生不見壽者命者說有壽者命者不見業性及業報性而示衆生有業業報不見生死諸煩惱性而說當知見生死煩惱不見涅槃而說至涅槃不見諸法有差別相而說諸法有善不善已能_以至無礙智岸現生欲界而不著欲界現行色界禪而不著色界現入無色定而生於色界現行色界禪而生於欲界現於欲界而不行欲界行悉知諸禪及知禪分自在皆能入禪出禪爲化衆生隨意所生一切生處悉能

受身常能成就深妙智慧除斷一切衆生諸行爲化衆生現有所行而於諸法實無所行皆已出過一切諸行久已滅除我我所心而示現受諸所須物菩薩成就如是智慧有所施作皆隨智慧而未曾爲業果所汙爲化衆生示現瘡痏而內實有微妙梵音通達語言經書術算不先思量當說何法隨所至衆所說皆妙悉能令喜心得堅固隨其所應而爲說法而是菩薩智慧不減堅意譬如男女若大若小隨所持器行詣水所若泉若池渠河大海隨器大小各滿而歸而此諸水無所減少如是堅意菩薩住首楞嚴三昧隨所至衆若刹利衆婆羅門衆若居士衆釋衆梵衆至是諸衆不加心力能以善言皆今喜悅隨宜所應而爲演法然其智辯無所減少堅意是名首楞嚴三昧般若波羅蜜本事果報佛告堅意菩薩住首楞嚴三昧衆生見者皆得度脫有聞名字有見威儀有聞說法有見默然而皆得度堅意譬如大藥樹王名爲喜見有人見者病皆得愈如是堅意菩薩住首楞嚴三昧衆生見者貪恚癡病皆得除愈如大藥王名曰滅除若鬪戰時用以塗鼓諸被箭射刀矛所傷得聞鼓聲箭出毒除如是堅意菩薩住首楞嚴三昧有聞

名者貪恚癡箭自然拔出諸邪見毒皆悉除滅一切煩惱不復動發堅意譬如藥樹名爲具足有人用根病得除愈莖節心皮枝葉華果皆能愈病若生若乾若段段截悉能除愈衆生諸病菩薩住首楞嚴三昧亦復如是於諸衆生無時不益常能滅除一切衆患謂以說法兼行四攝諸波羅蜜令得度脫若人供養若不供養有益無益而是菩薩皆以法利令得安隱乃至身死有食肉者若諸畜生二足四足及諸鳥獸人與非人是諸衆生皆以菩薩戒願力故死得生天常無病痛哀惱諸患堅意住首楞嚴三昧菩薩猶如藥樹佛告堅意菩薩住首楞嚴三昧六波羅蜜世世自知不從他學舉足下足入息出息念念常有六波羅蜜何以故堅意如是菩薩身皆是法行皆是法堅意譬如王若諸大臣百千種香擣以爲末若有人來索中一種不用餘香共相熏雜堅意如是百千衆香末中可得一種不雜餘不不也世尊堅意是菩薩以一切波羅蜜熏身心故於念念中常生六波羅蜜堅意菩薩云何於念念中生六波羅蜜堅意是菩薩一切悉捨心無貪著是檀波羅蜜心善寂滅畢竟無惡是尸波羅蜜知心盡相於諸塵中而無所傷是羼

提波羅蜜勤觀擇心知心離相是毗梨耶波羅蜜畢竟善寂調伏其心是禪波羅蜜觀心知心通達心相是般若波羅蜜堅意菩薩住首楞嚴三昧如是法門念念皆有六波羅蜜爾時堅意菩薩白佛言未曾有也世尊菩薩成就首楞嚴三昧其所施行不可思議世尊若諸菩薩欲行佛行當學是首楞嚴三昧何以故世尊是菩薩現行一切諸凡夫行而於其心無貪恚癡於時衆中有大梵王名曰成慈白佛言世尊若是菩薩欲行一切諸凡夫行而心無有貪恚癡行能言善哉善哉成慈誠如汝所說若菩薩欲行一切諸凡夫行當學首楞嚴三昧不念一切諸所學故堅意菩薩白佛言世尊菩薩欲學首楞嚴三昧當云何學射小准已次學射的學射的已次學射杖學射杖已射一毛已學射百分毛之一分能射是已名爲善射隨意不空是人若欲於夜闇中所聞音聲若人非人不用心力射之皆著如是堅意菩薩欲學首楞嚴三昧先當學愛樂心學愛樂心已當學深心學深心已

當學大慈學大慈已當學大悲學大悲已當學四聖
梵行所謂慈悲喜捨學四聖梵行已當學報得最上
五通常自隨身學是通已爾時便能成就六波羅蜜
成就六波羅蜜已便能通達方便通達方便已得住
第三柔順忍住第三柔順忍已得無生法忍得無生
法忍已諸佛授記諸佛授記已能入第八菩薩地入
第八菩薩地已得諸佛現前三昧得諸佛現前三昧
已常不離見諸佛常不離見諸佛已能具足一切佛
法因緣具足一切佛法因緣已能起莊嚴佛土功德
能起莊嚴佛土功德已能具生王家種姓入胎出生
能具生王家種姓入胎出生已能具十地具十地已
爾時便得受佛職號受佛職號已便得一切菩薩三
昧得一切菩薩三昧已然後乃得首楞嚴三昧得首
楞嚴三昧已能爲衆生施作佛事而亦不捨菩薩行
法堅意菩薩若學如是諸法則得首楞嚴三昧菩薩
已得首楞嚴三昧則於諸法無所復學何以故先已
善學一切法故譬如學射能射一毛分已不復學餘
所以者何先已學故如是堅意菩薩住首楞嚴三昧
於一切法無所復學一切三昧一切功德皆已學故
爾時堅意菩薩白佛言世尊我今欲說譬喻唯願聽

許佛言便說世尊譬如三千大千世界大梵天王自然普能徧觀三千大千世界不加功力如是菩薩住首楞嚴三昧於一切法自然能觀不用功力又亦能知一切衆生心心所行佛告堅意如汝所說若菩薩住首楞嚴三昧者悉知一切諸菩薩法一切佛法爾時會中有天帝釋名持須彌山於此三千大千世界最在邊外白佛言世尊譬如住於須彌山頂悉能觀見一切天下菩薩如是住首楞嚴三昧於諸聲聞辟支佛行及諸一切衆生之行自然能觀爾時堅意菩薩問是持須彌山釋言汝從何許四天下來住何須彌山頂是釋報言善男子若有菩薩得首楞嚴三昧不應問其所住處也所以者何如此菩薩一切佛國皆是住處而不著住處不得住處不見住處堅意問言仁者得是首楞嚴三昧耶釋言是三昧中寧復有得不得相耶堅意言不也釋言善男子當知菩薩行是三昧於諸法中都無所得堅意言如汝辯者必已得是首楞嚴三昧釋言善男子我不見法有所住處於一切法無所住者乃得首楞嚴三昧善男子住是三昧則於諸法都無所住若無所住卽無所取若無所取卽無所說爾時佛告堅意菩薩汝見是持須彌

山釋不已見世尊堅意是釋自然隨意能得首楞嚴
三昧住是三昧於此三千大千世界諸帝釋宮皆能
現身爾時此間釋提桓因白佛言世尊若持須彌山
釋於諸釋宮能現身者我於一切帝釋處所何故不
見爾時持須彌山釋語此釋言橋尸迦若我今以實
身示汝汝於官殿不復喜樂我常至汝所住官殿汝
不見我爾時釋提桓因白佛言世尊我欲見此大士
成就妙身佛言橋尸迦汝欲見耶世尊願樂欲見佛
語持須彌山釋言善男子汝示此釋真實妙身彼釋
卽現真實妙身爾時會中其諸釋梵護世天王聲聞
菩薩不得首楞嚴三昧者身皆不現猶若聚墨持須
彌山釋身如須彌山王高大巍巍光明遠照爾時佛
身倍更明顯釋提桓因白佛言未曾有也世尊今此
大士身色清淨殊妙難及是諸釋梵護世天王身皆
不現猶如聚墨世尊我於須彌山善妙堂上著釋迦
毗楞伽摩尼瓔珞以是光明一切天衆身皆不現我
今以此大士光明身不復現所著寶瓔珞亦無光色
佛告釋提桓因橋尸迦若此三千大千世界滿中釋
迦毗楞伽摩尼珠更有照明諸天摩尼珠能令此珠
皆不復現橋尸迦若此三千大千世界滿中照明諸

天摩尼珠更有金剛明摩尼珠能令此珠皆不復現
僑尸迦若此三千大千世界滿中金剛明摩尼珠更
有諸明集摩尼珠能令此珠皆不復現僑尸迦汝見
是釋所著諸明集摩尼珠不已見世尊但爲此珠其
光猛盛我眼不堪佛告僑尸迦若有菩薩得首楞嚴
三昧或作帝釋皆著如是摩尼瓔珞

佛說首楞嚴三昧經卷上

音釋

欄楯欄落千切
楯食闇切鉢鉢切徒困瘻力中切
病也瘻症瘻於金切
症烏下切瘻症疾不瘻症疾不羼提梵語也此云忍詰津私切
訪問也藝倪祭
能能言也脛脛四絳切擣都皓切
春也首楞嚴梵語也此云健相分別楞
脛脹脛脹知亮切盧盧登一切一切

雲棲寺奉
佛弟子金廣碩捐貲刻
佛說首楞嚴三昧經上卷仰懸
法力以資
先母黃氏之冥福
萬曆庚戌夏六月識

佛說首楞嚴三昧經卷中

姚秦三藏鳩摩羅什譯

爾時釋提桓因白佛言世尊諸有不發阿耨多羅三藐三菩提心者不得是清淨妙身亦復失是首楞嚴三昧於時瞿或天子語釋提桓因言諸聲聞人已入法位雖復稱歎愛樂佛道無能爲也已於生死作障隔故若人已發阿耨多羅三藐三菩提心者今發當發是人則應愛樂佛道能得如是上妙色身譬如有人從生而盲雖復稱歎愛樂日月然其不蒙日月光明如是聲聞入法位者雖復稱歎愛樂佛法而佛功

德於身無益是故若欲得此妙身大智慧者當發無上佛菩提心便得如是上妙色身瞿或天子說是語時萬二千天子發阿耨多羅三藐三菩提心爾時堅意菩薩問瞿或天子言行何功德轉女人身答言善男子發大乘者不見男女而有別異所以者何薩婆若心不在三界有分別故有男有女仁者所問行何功德轉女人身昔事菩薩心無諂曲云何而事答言如事世尊云何其心而不諂曲答言身業隨口口業隨意是名女人心無諂曲問言云何轉女人身答言如成問言云何如成答言如轉問言天子此語何義答言善男子一切諸法不成不轉諸法一味謂法性味善男子我隨所願有女人身若使我身得成男子於女身相不壞不捨善男子是故當知是男是女俱爲顛倒一切諸法及與顛倒悉皆畢竟離於二相堅意菩薩問瞿或言汝於首楞嚴三昧知少分耶答言善男子我知他得身自不證我念過世釋迦牟尼佛在淨飯王家爲菩薩時於宮殿內衆妓女中夜半清淨爾時東方恒河沙等諸梵王來有問菩薩乘者有問聲聞道者菩薩各隨所問而答於梵衆中有一梵王不解菩薩所行方便而作是言仁者乃有如是智

慧善答所問云何貪受王位色欲餘諸梵王了知菩薩智慧方便語此梵言菩薩不貪王位色欲將爲教化成就衆生處在居家現爲菩薩而今他方成就佛道轉妙法輪是梵聞已而作是言得何三昧能作如是自在神變餘梵謂言是首楞嚴三昧勢力善男子我於爾時而作是念菩薩三昧神力感應至未曾有倍加恭敬於菩薩所生世尊想深發阿耨多羅三藐三菩提心願於來世亦當成就如是功德善男子我所見者如是少分我唯知此首楞嚴三昧當有無量不可思議功德勢力堅意白佛言希有世尊是瞿或天子深心說此皆是如來爲作善知識常所護故世尊瞿或天子不久亦當住首楞嚴三昧得是自在神變勢力如今世尊所爲無異堅意菩薩白佛言世尊今此會中寧有得是首楞嚴三昧者不爾時會中有天子名現意語堅意菩薩言譬如賈客入於大海而作是言此大海中有摩尼珠可持去不汝語似是所以者何於今如來大智海會其中菩薩成就法寶發大莊嚴汝在中坐而作是問於此會中寧有菩薩得首是首楞嚴三昧者不堅意今此會中自有菩薩得首

楞嚴三昧現帝釋身有現梵王身有現諸天龍夜叉
乾闥婆阿脩羅迦樓羅緊那羅摩曠羅伽身有得首
楞嚴三昧現比丘比丘尼優婆塞優婆夷身有得首
楞嚴三昧以諸相好而自嚴身自有菩薩爲化衆生
現作女身形色相貌有現聲聞形色相貌有現辟支
佛形色相貌堅意如來自在隨所至衆若刹利衆婆
羅門衆若居士衆釋衆梵衆諸護世衆隨是諸衆普
能示現形色相貌當知皆是首楞嚴三昧本事果報
堅意若見如來所說法處當知此中則有無量諸大
菩薩大智自在發大莊嚴於一切法自在行者能隨
如來轉法輪者堅意菩薩白佛言世尊我今謂是現
意天子得此首楞嚴三昧如其智慧辯才無礙神通
如是佛言堅意如汝所說是現意天子已住首楞嚴
三昧通達是三昧故能作是說爾時佛告現意天子
汝可示現首楞嚴三昧本事少分現意天子語堅意
言仁者欲見首楞嚴三昧少勢力不答言天子願樂
欲見現意天子善得首楞嚴三昧力故卽現變應令
衆會者皆作轉輪聖王三十二相而自莊嚴及諸眷
屬七寶侍從天子問言汝見何等堅意答言我見衆
會皆作轉輪聖王色相眷屬七寶侍從爾時天子復

現衆會皆作釋提桓因處忉利宮百千天女作衆妓
樂圍繞娛樂復以神力普令衆會皆作梵王色相威
儀在於梵宮行四無量又問堅意汝見何等答言天
子我見衆會皆是梵王復現神力普令衆會皆作長
老摩訶迦葉形色相貌執持衣鉢入諸禪定行八解
脫皆無有異復現神力普令衆會皆如釋迦牟尼佛
身相好威儀各有比丘眷屬圍繞又問堅意汝見何
等答言天子我見大衆皆是釋迦牟尼佛身相好威
儀各有比丘眷屬圍繞現意天子謂堅意言是爲首
楞嚴三昧自在勢力如意堅意菩薩得首楞嚴三昧
能以三千大千世界入芥子中令諸山河日月星宿
悉現如故而不追述示諸衆生堅意首楞嚴三昧不
可思議勢力如是爾時諸大弟子及諸天龍夜叉乾
闍婆釋梵護世天王同聲白佛言世尊若人得是首
楞嚴三昧是人功德不可思議所以者何是人則爲
究竟佛道成就智慧神通諸明我等今日於一座上
普見衆會種種色相若干變現我等惟念若人不聞
首楞嚴三昧當知是爲魔所得便若得聞者當知是
人諸佛所護何況聞已隨說行者世尊菩薩若欲通
達佛法至於彼岸當一心聽首楞嚴三昧受持讀誦

爲他人說世尊菩薩若欲普現一切形色威儀欲悉
普知一切衆生心心所行又欲普知一切衆生隨病
與藥當善聽是三昧法寶受持讀誦世尊若人得是
首楞嚴三昧當知是人入佛境界智慧自在佛言如
是如是汝等說若人不得首楞嚴三昧不得名爲
深行菩薩如來不謂此人具足布施持戒忍辱精進
禪定智慧是故汝等若欲徧行一切道者當學得是
首楞嚴三昧不怠一切諸所學故爾時堅意菩薩問
現意天子言菩薩若欲得是三昧當修行何法天子
答言菩薩若欲得是三昧當修行凡夫法若見凡夫
法佛法不合不散是名修習首楞嚴三昧堅意問言
於佛法中有合散耶天子答言凡夫法中尚無合散
何況佛法云何名修行若能通達諸凡夫法佛法無
二是名修習而實此法無合無散善男子一切法集
無生相故一切法集無壞相故一切法集虛空相故
一切法集無受相故堅意復問首楞嚴三昧去至何
所天子答言首楞嚴三昧去至一切衆生心行而亦
不緣心行取相去至一切諸所生處而亦不爲生處
所汙去至一切世界佛所而不分別佛身相好去至
一切音聲語言而不分別諸文字相普能開示一切

佛法而不至於畢竟盡處善男子問是三昧至何處者隨佛所至是三昧者亦如是至堅意問言佛至何處天子答言佛如如故至無所至又問佛不至涅槃耶答言一切諸法究竟涅槃是故如來不至涅槃所以者何涅槃性故不至涅槃又問過去恒河沙等諸佛不至涅槃耶答言恒沙諸佛爲是生耶堅意言如來所說恒沙諸佛生已滅度天子言善男子如來不云一人出世多所饒益安樂衆生於意云何如來爲定得諸衆生有生滅耶天子如來於法不得生滅善男子當知如來雖說諸佛出於世間於如來相而實無生雖說諸佛至於涅槃於如來相如實無滅又問今現無量如來得成道不答言如來無生無滅相如是成道善男子若諸佛出若入涅槃無有差別所以者何如來通達一切諸法是寂滅相是名爲佛又問若一切法畢竟寂滅涅槃相者可通達耶答言如一切法畢竟寂滅同涅槃相通達相者亦復如是善男子如來不以生住滅出無生住滅是名佛出堅意問言汝住首楞嚴三昧能作如是說耶答言善男子於意云何如來化人住何法中而有所說堅意答言乘佛神力能有所說又問佛住何處而作化人答言佛

住不二神通而作化人天子言如如來住不住法而作化人諸化人亦住不住法而有所說堅意言若無所住云何有說天子言如無所住說亦如是又問菩薩云何具足樂說辯才答曰菩薩不以我相不以彼相不以法相而有所說是名具足樂說辯才隨所說法文字相不盡法相亦不盡如是說者不以二說是名具足樂說辯才又善男子若菩薩不捨諸法幻相於諸音聲不捨響相是名具足樂說辯才又如諸文字音聲語言無處無方無內無外無有所住從衆緣住非是過去未來現在不爲文字言辭所表內自通達而有所說是名具足樂說辯才譬喻如響一切音聲皆隨響相而有所說堅意問言隨義云何善男子隨虛空是隨義如虛空無所隨一切諸法亦無所隨諸法無比無有譬喻爲有得者言有所隨爾時世尊讚天子言善哉善哉如汝所說菩薩於此不應驚怖所以者何若有所隨不得阿耨多羅三藐三菩提堅意菩薩白佛言世尊是現意天子從何佛土來至此間天子謂言問作何等堅意答言我今欲向彼方作禮以是大士遊行住處天子謂言若人手得是首楞

嚴三昧者一切世間諸天人民皆應禮敬爾時佛告堅意菩薩是現意天子從阿閦佛妙喜世界來至於此是人於彼常說首楞嚴三昧堅意一切諸佛無有不說首楞嚴三昧者堅意是現意天子於此娑婆世界當得成佛是人欲斷此五濁惡取淨佛土教化衆生修習增長首楞嚴故來至於此堅意白佛言今此天子幾時當於此間世界得成佛道其號云何世界何名佛言是天子者過是賢劫千佛滅已六十二劫無復有佛中間但有百千萬億辟支佛出其中衆生得種種善根過是劫已當得成佛號淨光稱王如來世界爾時名爲淨見於時淨光稱王如來能令衆生心得清淨世界衆生不爲貪欲瞋恚愚癡所獲得法淨信皆行善法堅意是淨光稱王佛壽十小劫以三乘法度脫衆生其中無量無邊菩薩得首楞嚴三昧於諸法中得自在力爾時魔若魔民皆修大乘慈愍衆生其佛國土無三惡道及諸難處莊嚴清淨如鬱單越無衆魔事離諸邪見佛滅度後法住千萬億歲堅意是天子者當於如是清淨國土而成佛道爾時堅意菩薩謂天子言汝得大利如來授汝阿耨多羅三藐三菩提記天子答言善男子於一切法若無所

得是名大利於法有得是則無利善男子是故當知
若不得法是名大利說是語時二萬五千天子曾於
先世植衆德本皆發阿耨多羅三藐三菩提心有萬
菩薩得無生忍爾時舍利弗白佛言世尊未曾有也
今說首楞嚴三昧而是惡魔不來娆亂佛告舍利弗
汝欲見魔衰惱事不唯然欲見爾時佛放眉間白毫
汝欲見魔衰惱事不唯然欲見爾時佛放眉間白毫
大人相光一切衆會皆見惡魔被五繫縛不能自解
佛告舍利弗汝見惡魔被五縛不唯然已見此惡魔
者爲誰所縛佛言是首楞嚴三昧威神之力在所佛
上說首楞嚴三昧其中諸魔欲以惡心作障礙者首
楞嚴三昧及與諸佛威神力故其諸惡魔皆自見身
被五繫縛舍利弗在所說首楞嚴三昧處若我現在
若我滅後其中所有諸魔魔民及餘人衆懷惡心者
以首楞嚴三昧威神力故皆被五縛爾時會中天龍
夜叉乾闥婆等白佛言世尊我等於此三昧心無有
疑不爲障礙我等不欲身被五縛世尊我等恭敬此
三昧故皆當往護說是法者於是三昧生世尊想佛
告諸天龍神汝以是故當於十二見縛而得解脫何
等十二我見縛衆生見縛壽命見縛人見縛斷見縛
常見縛我作見縛我所見縛有見縛無見縛此彼見

縛諸法見縛是爲十二汝等當知若有衆生於佛法
中起瞋恨心欲毀壞者皆以住是十二見縛若人信
解隨順不逆於此十二見縛當得解脫爾時舍利弗
白佛言世尊惡魔於今得聞說此首楞嚴三昧名不
以威神力令魔不聞說首楞嚴三昧名字佛言且止
勿作此語假使恒河沙等世界滿中大火爲聞說此
首楞嚴三昧當從中過何以故若人但聞說首楞嚴
三昧我說此八大得善利勝得四禪生四梵處舍利
弗若使惡魔今得聞說首楞嚴三昧名字以此因緣
當得出過一切魔事若以被縛而得聞者亦當於此
十二見縛而得解脫是故舍利弗邪見惡人入魔網
者尚應聞此首楞嚴三昧何況淨心歡喜欲聞爾時
會中有一菩薩名魔界行不汗菩薩卽於會中忽然不現
今當現於魔界中自在神力令魔得住首楞嚴三昧無
佛言隨意時魔界行不汗菩薩卽於會中忽然不現
現於魔宮語惡魔言汝寧不聞佛說首楞嚴三昧無
量衆生皆發阿耨多羅三藐三菩提心出汝境界亦
皆當復度脫餘人出汝境界魔卽報言我聞佛說首
楞嚴三昧名字以被五縛不能得往所謂兩手兩足

及頭又問惡魔誰繫汝者魔卽答言我適發心欲往壞亂聽受首楞嚴三昧者卽被五縛我適復念諸佛菩薩有大威德難可壞亂我若往者或當自壞不如自住於此宮殿作是念已卽於五縛而得解脫菩薩答言如是一切凡夫憶想分別顛倒取相是故有縛動念戲論是故有縛見聞覺知是故有縛此中實無縛者解者所以者何諸法無縛本解脫故諸法無解本無縛故常解脫相無有愚癡如來以此法門說法若有衆生得知此義欲求解脫勤心精進則於諸縛而得解脫時魔衆中七百天女以天香華末香塗香及諸瓔珞散魔界行不汗菩薩而作是言我當何時於魔境界而得解脫菩薩報言汝等若能不壞魔縛則得解脫云何名爲魔縛謂六十二見若人不壞此諸見者卽於魔縛而得解脫天女復言云何名爲不壞諸見而得解脫答言諸見本無所從來去無所至若知諸見無去來相者卽於魔縛而得解脫諸見非有非無若不分別有無卽於魔縛而得解脫若無所見是爲正見如是正見無正無邪若法無正無邪無作無受卽於魔縛而得解脫是諸見者非內非外亦非中間如是知見亦復不念則於魔縛而得解脫七

百天女聞說此法卽得順忍而作是言我等亦當於魔界中行無所汙度脫一切魔所縛者爾時魔界行不汙菩薩語惡魔言汝諸眷屬已發阿耨多羅三藐菩提心汝作何等惡魔答言我被五縛不知所作菩薩答言汝發阿耨多羅三藐三菩提心當從此縛而得解脫時諸天女慈愍魔故皆作是言可發阿耨多羅三藐三菩提心勿於安隱生怖畏想勿於樂中而生苦想勿於解脫而生縛想爾時惡魔生詭曲心而作是言若汝捨離菩提心者我當發心時諸天女以方便力而謂魔言我等皆已捨離此心汝便可發阿耨多羅三藐三菩提心若一菩薩發菩提心一切菩薩亦同是心所以者何心無差別於諸衆生心皆平等爾時惡魔謂魔界行不汙菩薩言我今當發阿耨多羅三藐三菩提心以是善根令我縛解說此言已卽自見身從縛得解時魔界行不汙菩薩以神通力放大光明現淨妙身照於魔宮魔自見身無有威光猶如墨聚時魔衆中二百天女深著姪欲見此菩薩身色端正起浹愛心各作是言是人若能與我從事我等皆當隨順其教時此菩薩知諸天女宿緣應度卽時化作二百天子色貌端嚴如身無異又作二

百寶交露臺勝魔宮觀是諸天女皆自見身在此寶臺各各自謂與此菩薩共相娛樂所願得滿婬欲意息皆生深心愛敬菩薩菩薩卽時隨其所應而爲說法皆發阿耨多羅三藐三菩提心時魔界行不汙菩薩謂惡魔言汝可詣佛魔作是念我縛已解當詣佛所壞亂說法爾時惡魔眷屬圍繞行詣佛所白言世尊勿復說是首楞嚴三昧所以者何說是三昧我身卽時被五繫縛唯願如來更說餘事時堅意菩薩謂惡魔言誰解汝縛答言魔界行不汙菩薩解我繫縛汝許何事而得解脫魔言我許發阿耨多羅三藐三菩提心爾時佛告堅意菩薩今是惡魔爲解縛故發菩提心非清淨意如是堅意我滅度後後五百歲多有比丘爲利養故發菩提心非清淨意堅意汝觀首楞嚴三昧勢力佛法威神是諸比丘比丘尼優婆塞優婆夷以輕戲心貪利養心隨逐他心聞是三昧而發菩提心我皆知此心與阿耨多羅三藐三菩提得作因緣何況聞是首楞嚴三昧能以淨心發阿耨多羅三藐三菩提當知此人於佛法中已得畢定堅意菩薩白佛言世尊今此惡魔聞說首楞嚴三昧爲解縛故發菩提心亦得具足佛法因緣耶佛言如汝所

說惡魔以聞是三昧福德因緣及發菩提心因緣故
於未來世得捨一切魔事魔行魔詭曲心魔衰惱事
從今以後漸漸當得首楞嚴三昧力成就佛道堅意
菩薩謂惡魔言如來今已與汝授記魔言善男子我
今不以清淨心發阿耨多羅三藐三菩提如來何故
與我授記如佛言曰從心有業從業有報我自無心
求菩提道如來何故與我授記時佛欲斷衆會疑故
告堅意言菩薩授記凡有四種何謂爲四有未發心
而與授記有適發心而與授記有密授記有得無生
法忍現前授記是謂爲四唯有如來能知此事一切
聲聞辟支佛所不能知堅意云何名爲有未發心而
與授記或有衆生往來五道若在地獄若在畜生若
在餓鬼若在天上若在人間諸根猛利好樂大法佛
知是人過此若干百千萬億那由他佛教化若干百
千萬億無量衆生令住菩提又過若干百千萬億阿
僧祇劫當得阿耨多羅三藐三菩提號字如是國土
如是聲聞衆數壽命如是滅後法住歲數如是佛告
堅意如來悉能了知此事復過於是是名未發心而

與授記爾時長老摩訶迦葉前白佛言從今以後我等當於一切衆生生世尊想所以者何我等無有如是智慧何等衆生有菩薩根何等衆生無菩薩根世尊我等不知如是事故或於衆生生輕慢心則爲自傷佛言善哉善哉迦葉快說此言以是事故我經中說人則不應妄稱量衆生所以者何若妄稱量於他衆生則爲自傷唯有如來應量衆生及與等者以是因緣若諸聲聞及餘菩薩於諸衆生應生佛想適發心已得授記者或自有人久植德本修習善行勤心精進諸根猛利好樂大法有大悲心普爲衆生求解脫道是人發心卽住阿惟越致入菩薩位墮畢定數出過八難如是等人適發心時諸佛卽與授阿耨多羅三藐三菩提記名號如是國土如是壽命如是如是等人如來知心而與授記是名發心卽與授記密授記者自有菩薩未得授記而常精勤求阿耨多羅三藐三菩提樂種種施樂一切施受法堅固持戒不捨深發莊嚴有大忍力等心衆生勤行精進求諸佛法身心不懈如救頭然行念安隱能得四禪樂求智慧行佛菩提久行六度有成佛相時餘菩薩天龍夜叉乾闥婆等皆作是念如此菩薩勤心精進實爲希

有幾時當得阿耨多羅三藐三菩提其號云何國土
何名聲聞衆數多少云何佛爲斷此衆生疑故而與
授記普令衆會皆得聞知唯是菩薩獨不得聞佛神
力故令一切衆知是菩薩成佛號字國土如是聲聞
衆數多少如是衆所疑者時悉決了於此菩薩生世
尊想而是菩薩不能自知我爲得記爲未得記是爲
菩薩密得授記現前授記者有菩薩久集善根無不
見得常修梵行觀無我空於一切法得無生忍佛知
此人功德智慧悉已具足則於一切天人魔梵沙門
婆羅門大衆之中現前授記作是言善男子汝過若
千百千萬億劫當得成佛號字如是國土如是聲聞
衆數壽命如是時無數人隨效是人皆發阿耨多羅
三藐三菩提心是人佛前得授記已身升虛空高七
多羅樹堅意是名第四現前授記爾時堅意菩薩白
佛言今此會中寧有菩薩以此四事得授記不佛答
言有世尊誰是佛言此師子吼王菩薩樂欲居士子
是未發心而得授記如是等他方世界無數菩薩亦
未發心而得授記復有寂滅菩薩大德法王子菩薩
文殊師利法王子菩薩如是無量諸菩薩等適發心
時卽與授記皆住阿惟越致地中是中復有智勇菩

薩益意菩薩如是無量諸菩薩等密與授記堅意我及彌勒賢劫千菩薩皆得無生法忍現前授記堅意菩薩白佛言希有世尊菩薩所行不可思議授記亦不可思議一切聲聞諸辟支佛尚不能知況餘衆生佛言堅意菩薩所行所發精進威神勢力不可思議爾時應界行不汙菩薩所化天女令發阿耨多羅三藐三菩提心者各以天華散於佛上白佛言世尊我等不樂密得授記我等願得無生法忍現前授記唯願世尊於今與我授阿耨多羅三藐三菩提記佛時微笑口出種種妙色光明照諸世界還從頂入阿難白佛言世尊何因故笑佛告阿難汝今見是一百天女合掌敬禮如來者不已見世尊阿難是諸天女已曾於昔五百佛所深種善根從是已去當復供養無數諸佛過七百阿僧祇劫已皆得成佛號曰淨王阿難是諸天女命終之後得轉女身皆當生於兜率天上供養奉事彌勒菩薩爾時惡魔聞諸天女得授記已白佛言世尊我今自於所有眷屬不得自在以聞說是首楞嚴三昧故況餘聞者若人得聞首楞嚴三昧卽得畢定住佛法中爾時天女以無怯心語惡魔言汝勿大愁我等今者不出汝界所以者何魔界如

卽是佛界如魔界如佛界如不二不別我等不離是
如魔界相卽是佛界相魔界法佛界法不二不別我
等於此法相不出不過魔界無有定法可示佛界亦
無定法可示魔界佛界不二不別我等於此法相不
出不過是故當知一切諸法無有決定無決定故無
有眷屬無非眷屬爾時惡魔憂愁苦惱欲還天上魔
界行不汙菩薩謂惡魔言汝欲何去魔言我今欲還
所住宮殿菩薩謂言不離是衆卽是汝宮殿爾時惡
魔卽自見身處本宮殿菩薩語言汝見何等惡魔答
言我自見身處本宮殿好林園池是我所有菩薩語
言汝今可以奉上如來魔言可爾適作是語卽見如
來聲聞菩薩一切大眾皆在其中說首楞嚴三昧爾
時阿難白佛言世尊佛所住處說首楞嚴三昧有施
食已佛得成道此二施主何者福多佛言阿難施佛
食已佛成阿耨多羅三藐三菩提食已轉法輪食已
說首楞嚴三昧此三食福無有差別阿難我於何處
得阿耨多羅三藐三菩提當知其處卽是金剛過去
未來現在諸佛皆於其中得成佛道隨所住處說首
楞嚴三昧等無差別及有讀誦書寫之處亦復如是
阿難施佛食已初轉法輪若有法師得施食已讀誦

說是首楞嚴三昧此二施福等無有異又復阿難佛住精舍以十八種神通變化度脫衆生復有精舍於中讀誦說是首楞嚴三昧此二福處其福不異爾時阿難語惡魔言汝得大利能以宮殿施佛令住魔言是魔界行不汙菩薩恩力所致堅意菩薩白佛言世尊是魔界行不汙菩薩住首楞嚴三昧神力自在乃如是乎

佛言堅意如汝所說今此菩薩住是三昧能以神力隨意自在示現一切行魔界行而能不爲魔行所汙與諸天女現相娛樂而實不受婬欲惡法是善男子住首楞嚴三昧現入魔宮而身不離於佛會現行魔界遊戲娛樂而以佛法教化衆生

佛說首楞嚴三昧經卷中

音釋

迫迮

追博陌切逼也
近側革切狹也

鬱單越

梵語也此云勝縛符處
鬱於勿切

各

切繫
也

兜率

梵語具云兜率陀亦云觀史陀此云知足兜都俟切率那律切

雲棲寺奉
佛弟子金廣頑捐貲刻

佛說首楞嚴三昧經中卷仰憑
法力以資

先母黃氏之冥福
萬曆庚戌夏六月識

佛說首楞嚴三昧經卷中

佛說首楞嚴三昧經卷下

姚秦三藏鳩摩羅什譯

堅意菩薩白佛言世尊如來住是首楞嚴三昧能現
幾所自在神力善哉世尊願少演說佛言堅意我今
住此首楞嚴三昧於此三千大千世界百億四天下
百億日月百億四天王處百億忉利天百億夜摩天
百億兜率陀天百億化樂天百億他化自在天乃至
百億阿迦貳吒天百億須彌山王百億大海是名三
千大千世界堅意我住首楞嚴三昧於此三千大千
世界或於闍浮提現行檀波羅蜜或於闍浮提現行

尸波羅蜜或於闍浮提現行辱提波羅蜜或於闍浮
提現行毗梨耶波羅蜜或於闍浮提現行禪波羅蜜
或於闍浮提現行般若波羅蜜或於闍浮提現爲五
通神仙或於闍浮提現在居家或於闍浮提現行出
家或於四天下或現在兜率天一生補處或於四天
下現爲轉輪聖王或爲釋提桓因或爲梵王或爲四
天王或爲夜摩天王或爲兜率陀天王或爲化樂天
王或爲他化自在天王或現長者或現居士或復現
爲小王大王或爲刹利或爲婆羅門或爲菩薩或於
四天下欲從兜率下生世間或現入胎或現處胎或
現欲生或現生已行七步舉手自稱天上天下唯我
爲尊或現處宮與殊女俱或現出家或現苦行或現
取草或現坐道場或現降魔或現成佛或現觀樹王
或現釋梵請轉法輪或現轉法輪或現捨壽或現入
涅槃或現燒身或現全身舍利或現散身舍利或現
法欲滅或現法已滅或現壽命無量或現壽命短促
或現國土無惡道名或現有諸惡道或現闍浮提清
淨嚴飾如天宮殿或現弊惡或現上中下堅意是皆
首楞嚴三昧自在神力菩薩示現入於涅槃不畢竟
滅而於三千大千世界能現如是自在神力亦現如

是諸莊嚴事堅意汝觀如來於此四天下轉法輪餘
間浮提未成佛道或有間浮提現入滅度是名首楞
嚴三昧所入法門爾時會中諸天龍夜叉乾闥婆等
諸菩薩大弟子咸作是念釋迦牟尼佛但能於此三
千大千世界有是神力於餘世界亦有是力時文殊
師利法王子知衆會意欲斷所疑白佛言世尊我所
遊行諸佛國土於是世界上過六十恒河沙土有佛
世界名一燈明佛於其中爲人說法我至其所頭面
禮足問言世尊號字何等我等云何奉持佛名彼佛
答我汝詣釋迦牟尼佛自當答汝世尊彼佛國土功
德莊嚴說之一劫猶不可盡復過於是彼國無有聲
聞辟支佛名但有諸菩薩僧常說不退轉法輪唯願
世尊說此佛名一燈明土講說法者爾時佛告文殊
師利法王子汝等善聽勿懷恐怖而生疑悔所以者
何諸佛神力不可思議首楞嚴三昧勢力亦不可思
議文殊師利彼一燈明土講說法者佛號示一切功
德自在光明王文殊師利一燈明土示一切功德自
在光明王佛則是我身於彼國土現佛神力我於彼
土說不退轉法輪是我宿世所修淨土文殊師利汝
今當知我於無量無邊百千萬億那由他土盡有神

力一切聲聞辟支佛所不能知文殊師利此則皆是首楞嚴三昧勢力菩薩常於無量世界示現神變於此三昧而不動轉文殊師利譬如日月自於宮殿初不移動而現一切城邑聚落菩薩如是住首楞嚴三昧初不移動而能徧於無量世界示現其身隨衆所樂而爲說法爾時衆會得未曾有皆大歡喜踊躍無量合掌恭敬及諸天龍夜叉乾闥婆阿脩羅迦樓羅緊那羅摩睺羅伽等以真珠華雜色妙華末香塗香散於佛上皆作諸天所有妓樂供養如來及諸弟子亦各脫上衣奉上於佛諸菩薩等以妙色華大如須彌并衆雜香末香塗香珍寶瓔珞散於佛上皆作是言唯然世尊若有說首楞嚴三昧處其地則爲金剛若人得聞說是三昧信受讀誦爲人演說不驚不畏當知此人亦是金剛成不壞忍深住於信諸佛所護厚種善根得大善利降魔怨敵斷諸惡趣爲善知識之所守護世尊如我解佛所說義若有衆生聞是首楞嚴三昧卽能信受讀誦解義爲人演說如說修行當知是人得住佛法畢定不退佛言如是如是汝等說若人不厚種諸善根聞首楞嚴三昧不能信受少有衆生聞首楞嚴三昧能信受者多有衆生不能

信受善男子人有四法聞是三昧能得信受何等爲
四一者曾於過去諸佛聞是三昧二者爲善知識所
護深樂佛道三者善根深厚好樂大法四者身自得
證大乘深法有是四法則能信受如是三昧善男子
復有滿願阿羅漢及具足正見者信行見行者是人
信順如來語故信是三昧而身不證所以者何是三
昧者一切聲聞辟支佛所不能通達況餘衆生爾時
長老摩訶迦葉白佛言世尊譬如從生盲人夢中得
眼見種種色心大歡喜卽於夢中與有眼者共住共
語是人覺已不復見色我等亦爾未聞是首楞嚴三
昧時心懷歡喜謂得天眼與諸菩薩共住共語論說
義理世尊我今從佛聞是三昧不知其事如生盲人
不能得知諸佛菩薩所行之法我等從今已往自視
其身如生盲人於佛深法無有智慧不知不見世尊
所行我等從今已往知諸菩薩真得天眼能得如是
諸深智慧世尊若人無有薩婆若心誰當自謂我是
智者我是福田佛言如是如是迦葉如汝所說菩薩
所得諸深智慧聲聞辟支佛所不能及摩訶迦葉說
是語時八千衆生皆發阿耨多羅三藐三菩提心
爾時堅意菩薩問文殊師利法王子言文殊師利所

言福田云何名爲福田文殊師利言有十法行名爲
福田何等爲十住空無相無願解脫門而不入法位
見知四諦而不證道果行八解脫而不捨菩薩行能
起三明而行於三界能現聲聞形色威儀而不隨音
聲從他求法現辟支佛形色威儀而以無礙辯才說
法常在禪定而能現行一切諸行不離正道而現入
邪道深貪染愛而離諸欲一切煩惱入於涅槃而於
生死不壞不捨有是十法當知是人真實福田爾時
堅意菩薩問須菩提言長老須菩提世尊說汝第一
福田汝爲得在是十法不須菩提言我於是法尚無
其一何況有十堅意言汝以何名第一福田須菩提
言我不於佛諸菩薩中第一福田佛說我於聲聞辟
支佛中第一福田堅意譬如邊地小王亦名爲王若
轉輪聖王至於邊地諸小王等不名爲王爾時唯有
菩薩我於其中不名福田諸菩薩等有薩婆若心是
故勝我爾時佛讚須菩提言善哉善哉如汝所說是
無增上慢大弟子之所言也堅意菩薩復問文殊師
利法王子言文殊師利所說多聞云何名爲多聞文

殊師利言若人得聞一句之法卽解其中千萬億義
百千萬劫敷演解說智慧辯才不可窮盡是名多聞
復次堅意菩薩若聞十方無量諸佛所說盡能受持
無有一句先所不聞凡所聞者皆是先聞隨所聞法
能持不忘爲衆生說而無衆生身與衆生及所說法
無有差別是名多聞爾時會中有菩薩天子名淨月
藏作是念復說阿難於多聞中爲最第一如文殊師
利所說多聞阿難今者寧有是不作是念已問阿難
言如來說汝於多聞中爲最第一汝之多聞寧如文
殊師利所說者不阿難答言如文殊師利所說多聞
我無是事淨月藏言如來云何常稱說汝於多聞中
爲最第一阿難答言佛諸弟子隨逐音聲而得解脫
於是人中說我第一非謂我於無量智海無等大慧
無礙辯才諸菩薩中多聞第一天子譬如以有日月
光明闇浮提人見諸形色得有所作我亦如是俱以
如來智慧光明得受持法我於其中自無有力當知
皆是如來神力

爾時世尊讚阿難言善哉善哉如汝所說汝所受持
誦念諸法當知則是如來神力爾時佛告淨月藏言
阿難所持諸法甚少所不誦者無量無邊天子我於

道場所得諸法百千億分不說其一我所說者阿難
於中百千億分不持其一天子如來但於一日一夜
十方世界諸釋梵王護世天王天龍夜叉乾闔婆等
天子菩薩與之說法以智慧力而作偈頌說修多羅
因緣譬喻衆生所行諸波羅蜜及說聲聞辟支佛乘
佛無上乘攝大乘法毀訾生死稱讚涅槃假使閻浮
提內所有衆生成就多聞皆如阿難於百千劫不能
受持天子以是因緣當知如來所說諸法無量無邊
阿難所持甚爲少耳爾時淨月藏天子卽以十萬七
寶華蓋奉上如來其蓋卽時徧住虛空所覆衆生皆
作金色奉上蓋已作如是言唯然世尊願以是福普
使衆生辯才說法當如世尊能受持法如文殊師利
法王子時佛知是菩薩天子深樂佛道與授阿耨多
羅三藐三菩提記而作是言今是天子過四百四十
萬劫當得作佛號一寶蓋國名一切衆寶莊嚴說是
法時二百菩薩生懈怠心諸佛世尊其法甚深阿耨
多羅三藐三菩提如是難得我等不能具足是事不
如但以辟支佛乘入於涅槃所以者何佛說菩薩若
有退轉或作辟支佛或作聲聞

爾時文殊師利法王子知此二百菩薩有懈退心欲

還發起令得阿耨多羅三藐三菩提亦欲教化會中天龍夜叉乾闥婆阿脩羅迦樓羅緊那羅摩睺羅伽等故白佛言世尊我念過去劫名照明我於其中三百六十億世以辟支佛乘入於涅槃爾時一切衆會心皆生疑若入涅槃不應復還生死相續今文殊師利何故作如是言世尊我念過去劫名照明我於其中三百六十億世以辟支佛乘入於涅槃是事云何爾時舍利弗承佛神旨白佛言世尊若人已得入於涅槃不應復有生死相續云何文殊師利入涅槃已還復出生佛言汝可問之文殊師利自當答汝時舍利弗問文殊師利言若人已得入於涅槃於諸有中不復相續汝今云何而作是說世尊我念過去照明劫中三百六十億世以辟支佛乘入於涅槃此義云何文殊師利言如來現在是一切知者一切見者真實語者不欺詐者世間天人無能詐者我所說者佛自證知我若異說則爲詐佛舍利弗彼時照明劫中有佛出世號曰弗沙利益世間諸天人已入於涅槃是佛滅後法住十萬歲法滅之後其中衆生於辟支佛有度因緣假使百千億佛爲之說法不信不受唯皆可以辟支佛身威儀法則而得度脫是諸衆生皆

共志求辟支佛道是時無有辟支佛出是諸衆生無處得種善根因緣我於爾時爲教化故自稱我身是辟支佛隨諸國土城邑聚落皆知我身是辟支佛我時皆爲現辟支佛形色威儀是諸衆生深心恭敬皆以飲食供養於我我受食已觀其本緣所應聞法爲解說已身飛虛空猶如鴈王是時衆生皆大歡喜以恭敬心頭面禮我而作是言願使我等於未來世皆得法利如今是人舍利弗以是因緣成就無量無數衆生今種善根我時觀察知諸人衆供養我食生懈厭心卽時告言我涅槃時至百千衆生聞是語已各持華香雜香酥油來至我所我於爾時入滅盡定以本願故不畢竟滅是諸衆生謂我命終供養我故以香薪積而燒我身謂我實滅我時復至異國大城自稱我是辟支佛身其中衆生亦以飲食來供養我我於其中示入涅槃亦謂我滅皆來供養共燒我身如是舍利弗我於爾時滿一小劫三百六十億世作辟支佛身示入涅槃於諸大城一一皆以辟支佛乘度脫三十六億衆生舍利弗菩薩如是以辟支佛乘入於涅槃而不永滅文殊師利說是語時三千大千世界六種震動光明徧照千億衆生諸天供養文殊師

利法王子爾諸天華皆作是言是實希有我等今日
得大善利見佛世尊及見文殊師利法王子又聞說
是首楞嚴三昧世尊文殊師利法王子成就如是未
曾有法住何三昧能現如是未曾有法佛告諸天子
文殊師利法王子住首楞嚴三昧能作如是希有難
事菩薩住此三昧爲作信行而不隨他信亦作法行
而於法相轉於法輪不退不失亦作入人於諸無量
阿僧祇劫爲入邪者而行於道作須陀洹爲生死水
漂流衆生不入法位作斯陀含偏現其身於諸世間
作阿那含亦復來還教化衆生作阿羅漢亦常精進
求學佛法亦作聲聞以無礙辯爲人說法作辟支佛
爲欲教化因緣衆生示入涅槃三昧力故還復出生
諸天子菩薩住是首楞嚴三昧皆能偏行諸賢聖行
亦隨其地有所說法而不住中諸天聞佛說如是義
悉皆涕淚而作是言世尊若人已入聲聞辟支佛位
永失是首楞嚴三昧世尊人寧作五逆重罪得聞說
是首楞嚴三昧不入法位作漏盡阿羅漢所以者何
五逆罪人聞是首楞嚴三昧發阿耨多羅三藐三菩提
提心已雖本罪緣墮在地獄聞是三昧善根因緣還
得作佛世尊漏盡阿羅漢猶如破器永不堪任受是

三昧世尊譬如有人施酥油蜜多有人衆持種種器
中有一人用心不固破所持器雖詣所施酥油蜜所
無所能益但得自飽不能持還施與餘人是中有人
持器完堅既得自飽亦持滿器施與他人酥油蜜者
是佛正法所持器破但得自足不能持還施他人者
卽是聲聞及辟支佛持完器者卽是菩薩身自得足
亦能持與一切衆生是時二百天子心欲退轉於阿
耨多羅三藐三菩提不復隨先退轉之心皆白佛言
殊師利法王子不可思議功德勢力更以深心發阿
耨多羅三藐三菩提不復隨先退轉之心皆白佛言
我等乃至危害失命不捨是心亦終不捨一切衆生
世尊唯願我等聞是首楞嚴三昧善根因緣當得菩
薩十力何等十於菩提心得堅固力於不可思議佛
法得深信力於多聞中得不忘力往來生死得無疲
力於諸衆生得堅固大悲力於布施中得堅捨力於
持戒中得不壞力於忍辱中得堅受力魔不能壞得
智慧力於諸深法得信樂力爾時佛告堅意菩薩若
有衆生於今現在若我滅後聞是首楞嚴三昧能信
樂者當知是人悉皆得是菩薩十力爾時會中有菩
薩名曰名意白佛言世尊若欲得福者應供養佛欲

得慧者應勤多聞欲生好處應勤持戒欲大富者應
加布施欲得妙色者應修忍辱欲得辯才者應敬師
長欲得陀羅尼者應離增上慢欲得智者應修正憶
念欲得樂者應捨一切惡欲利益衆生者應發菩提
心欲得妙音聲者應修實語欲得功德者應樂遠離
欲求法者應近善知識欲坐禪者應離憤闇欲思慧
者應修思惟欲生梵世者應修無量心欲生天人應
修十善世尊若人欲得福德者欲得慧者欲生好處
者欲大富者欲妙色者欲辯才者欲陀羅尼者欲得
智者欲得樂者欲利益衆生者欲妙音聲者欲功德
者欲求法者欲坐禪者欲思慧者欲生梵世者欲生
天人者欲得涅槃者欲得一切功德者當聞首楞嚴
三昧受持讀誦爲他人說如說修行世尊菩薩云何
修是三昧佛言名意菩薩若能觀諸法空無所障礙
念念滅盡離於憎愛是名修是三昧復次名意學是
三昧不以一事所以者何隨諸衆生心心所行是三
昧者有是諸行隨諸衆生心心所入是三昧者有是
諸入隨諸衆生諸根入門是三昧者有是入門隨諸
衆生所有名色得是三昧菩薩亦示若干名色能如
是知是名修是三昧隨一切佛名色相貌得是三昧

菩薩亦示若干名色相貌能如是知是名修是三昧隨見一切諸佛國土菩薩亦自成是國土是名修是首楞嚴三昧名意菩薩白佛言世尊是三昧者修行甚難佛告名意以是事故必有菩薩住是三昧多有菩薩行餘三昧

爾時名意菩薩白佛言世尊此彌勒菩薩一生補處次於世尊當得阿耨多羅三藐三菩提彌勒得是首楞嚴三昧耶佛言名意其諸菩薩得住十地一生補處受佛正位悉皆得是首楞嚴三昧彌勒菩薩卽時示現如是神力名意菩薩及諸衆會見此三千大千世界諸閻浮提其中皆是彌勒菩薩或見在天上或見在人間或見出家或見在家或見侍佛皆如阿難或見智慧第一如舍利弗或見神通第一如目犍連或見頭陀第一如大迦葉或見說法第一如富樓那或見密行第一如羅睺羅或見持律第一如優波離或見天眼第一如阿那律或見坐禪第一如離婆多如是一切諸第一中皆見彌勒或見入諸城邑聚落乞食或見說法或見坐禪名意菩薩及諸天衆一切皆見彌勒菩薩現首楞嚴三昧神通勢力見已卽大歡喜白佛言世尊譬如真金雖復鍛磨不失其性是

諸大士亦復如是隨所試處皆能示現不思議法性爾時名意菩薩白佛言世尊我謂菩薩若能通達首楞嚴三昧當知通達一切道行於聲聞乘辟支佛乘及佛大乘皆悉通達佛言如是如是如汝所說菩薩若能通達首楞嚴三昧則能通達一切道行

爾時長老摩訶迦葉白佛言世尊我謂文殊師利法王子曾於先世已作佛事現坐道場轉於法輪示諸衆生入大滅度佛言如是如是如汝所說迦葉過去久遠無量無邊不可思議阿僧祇劫爾時有佛號龍種上如來應供正徧知明行足善逝世間解無上士調御丈夫天人師佛世尊於此世界南方過於千佛國土國名平等無有山河沙礫瓦石丘陵堆阜地平如掌生柔軟草如迦陵伽龍種上佛於彼世界得阿耨多羅三藐三菩提初轉法輪教化成就七十億數諸菩薩衆八十億人成阿羅漢九萬六千人住辟支佛因緣法中其後續有無量聲聞僧迦葉龍種上佛壽命四百四十萬歲度天人已入於涅槃散身舍利流布天下起三十六億塔衆生供養其佛滅後法住十萬歲龍種上佛臨欲涅槃與智明菩薩授記荊言此智明菩薩次於我後當得阿耨多羅三藐三菩提

亦號智明迦葉汝謂爾時平等世界龍種上佛豈異人乎勿生此疑所以者何卽文殊師利法王子是迦葉汝今且觀首楞嚴三昧勢力諸大菩薩以是力故示現入胎初生出家詣菩提樹坐於道場轉妙法輪入般涅槃分布舍利而亦不捨菩薩之法於般涅槃不畢竟滅爾時長老摩訶迦葉語文殊師利言仁者乃能施作如此希有難事示現衆生文殊師利言迦葉於意云何是耆闍崛山誰之所造是世界者亦從何出迦葉答言文殊師利一切世界水沫所成亦從衆生不可思議業因緣出文殊師利言一切諸法亦從不可思議業因緣有我於是事無有功力所以者何一切諸法皆屬因緣無有主故隨意所成若能解此所爲不難迦葉若人未見四諦聞如是事能信解者此則爲難見四諦已得諸神通聞此能信不足爲難

爾時世尊身升虛空高七多羅樹結跏趺坐身出光明徧照十方無量世界一切衆會皆見十方無量諸佛悉皆說是首楞嚴三昧不增不減悉遙得聞十方諸佛亦升虛空高七多羅樹結跏趺坐身放光明徧照十方無量世界彼衆生亦見釋迦牟尼佛身升

虛空結加趺坐彼諸衆會悉皆以華遙散釋迦牟尼
佛皆見衆華於上空中合成華蓋此土菩薩及諸天
龍夜又乾闥婆等悉亦以華散彼諸佛皆於佛上化
成華蓋爾時釋迦牟尼佛還攝神足坐於本座告堅
意言是爲如來神通之力爲令衆生功德增益是故
如來示現是事佛現神通力時八千天人發阿耨多
羅三藐三菩提心又說是首楞嚴三昧垂欲竟時堅
意菩薩及五百菩薩得首楞嚴三昧悉皆得見十方
諸佛所有神力於佛深法得智光明住第十地受佛
職位三千大千世界六種震動放大光明徧照世界
千萬妓樂同時俱作諸天空中雨種種華爾時佛告
阿難汝當受是首楞嚴三昧持諷誦讀廣爲人說時
持須彌山頂釋白佛言世尊阿難智慧憶念有量聲
聞人者隨他音聲何故以是三昧法寶囑累阿難持
須彌山頂釋發至誠言若我能於今世來世廣宣流
布是寶三昧無有虛者於此耆闍崛山中樹悉皆當
如佛菩提樹其諸樹下皆有菩薩持須彌山頂釋作
是語已卽見諸樹如菩提樹一一樹下皆見菩薩諸
菩提樹皆出是言如持須彌山頂釋所言爲實是人
必能令此三昧廣宣流布爾時諸天龍神夜又乾闥

婆等同聲白佛言世尊假使如來住壽一劫不爲餘事以聲聞乘爲人說法一一說法皆悉如初轉法輪時所度衆生說是首楞嚴三昧所度衆生此則爲勝所以者何是諸衆生皆以聲聞乘度於菩薩乘百分不及一百千萬億分乃至算數譬喻所不能及如是首楞嚴三昧有是無量勢力能成就諸菩薩使得具足佛法

爾時堅意菩薩白佛言世尊實壽幾何幾時當入畢竟涅槃佛言堅意東方去此世界三萬二千佛土國名莊嚴是中有佛號照明莊嚴自在王如來應供正徧知明行足善逝世間解無上士調御丈夫天人師佛世尊今現在說法堅意如照明莊嚴自在王佛壽命我所壽命亦復如是世尊是照明莊嚴自在王佛壽命幾所佛告堅意汝自往問自當答汝卽時堅意承佛神力又以首楞嚴三昧力故及自善根神通力故如一念頃到彼莊嚴世界頭面禮彼佛足右繞三匝却住一面白佛言世尊壽命幾時當入涅槃彼佛答言如彼釋迦牟尼佛壽命我所壽命亦復如是堅意汝欲知者我壽七百阿僧祇劫釋迦牟尼佛壽命亦爾爾時堅意菩薩心大歡喜卽還娑婆世界白佛

言世尊彼照明莊嚴自在王佛壽七百阿僧祇劫而
告我言如我壽命釋迦牟尼佛壽命亦復如是爾時
阿難從座而起偏袒右肩合掌向佛白佛言世尊如
我解佛所說義我謂世尊於彼莊嚴世界以異名字
利益衆生爾時世尊讚阿難言善哉善哉汝以佛神
力能知是事彼佛身者卽是我身以異名字於彼說
法度脫衆生阿難如是神通自在力者皆是首楞嚴
三昧勢力爾時佛告堅意菩薩堅意以是事故當知
我壽七百阿僧祇劫乃當畢竟入於涅槃時會大衆
聞佛所說壽命如是不可思議皆大歡喜得未曾有
白佛言世尊諸佛神力至未曾有一切所行不可思
議於此現壽如是短命而實於彼七百阿僧祇劫世
尊願使一切衆生具足如是不可思議壽命爾時世
尊復告堅意是首楞嚴三昧隨在郡國城邑聚落精
舍空林其中諸魔魔民不得其便又告堅意若有法
師書寫讀誦解說是首楞嚴三昧於人非人無有恐
怖復得二十不可思議功德之分何等二十功德不
可思議其智不可思議其慧不可思議方便不可思
議辯才不可思議法明不可思議總持不可思議法
門不可思議憶念隨義不可思議諸神通力不可思

議分別衆生諸所語言不可思議深解衆生心之所
樂不可思議得見諸佛不可思議所聞諸法不可思
議教化衆生不可思議自在三昧不可思議成就淨
土不可思議形色最妙不可思議功德自在不可思
議修治諸波羅蜜不可思議得不退轉佛法不可思
議是爲二十堅意若人書寫讀誦是首楞嚴三昧得
是二十不可思議功德之分是故堅意若人欲得今
世來世諸利當書寫讀誦解說修行是首楞嚴三昧
堅意若求佛道善男子善女人於十萬劫勤心修行
六波羅蜜若有聞是首楞嚴三昧卽能信受心不退
沒不驚不畏福勝於彼疾至阿耨多羅三藐三菩提
何況聞已受持讀誦如說修行爲人解說若有菩薩
欲聞諸佛不思議法不驚不畏欲於一切諸佛法中
現了自知不從他教應當修習行是三昧若欲得聞
所未聞法信受不逆應當聞是首楞嚴三昧說是首
楞嚴三昧經時無量衆生發阿耨多羅三藐三菩提
心復倍是數住阿惟越致地復倍是數得無生法忍
萬八千菩薩得是首楞嚴三昧萬八千比丘比丘尼
不受諸法故漏盡解脫得阿羅漢二萬六千優婆塞
優婆夷於諸法中得法眼淨三十那由他諸天得入

聖位佛說經已文殊師利法王子堅意菩薩等一切
諸菩薩摩訶薩及諸聲聞大弟子一切諸天龍神乾
闔婆阿脩羅等世間人民聞佛所說歡喜信受

佛說首楞嚴三昧經卷下

音釋

盲

莫耕切目疑牛代切

詎

古況切

積

疾智切

憤闊

無童子也

礙阻也

詐

也

計

也

也

債古對切心亂也

都玩切

輒

乳充切

耆

柔弱也

闊

開奴教切不靜也

鍛錄也

也

此云靈鷲者渠伊切

也

也

也

未曾有因緣經卷上

蕭齊三藏沙門釋曇景譯

如是我聞一時佛在舍衛國祇樹給孤獨園爾時世
尊告目犍連汝今往彼迦毗羅城問訊我父閻頭檀
王并我姨母波闍波提及三叔父斛飯王等因復慰
喻羅睺羅母耶輸陀羅令割恩愛放羅睺羅令作沙
彌修習聖道所以者何母子恩愛歡樂須臾死墮地
獄母之與子各不相知窈窕冥冥永相離別受苦萬
端後悔無及羅睺得道當還度母永絕生老病死根
本得至涅槃如我今也目連受命卽入禪定譬如力

士屈伸臂頃到迦毗羅城淨飯王所而白王言世尊
慇懃致問無量起居輕利氣力安不及大夫人波闍
波提并三叔父斛飯王等問訊起居亦復如是時耶
輸陀羅聞佛遣使來至王所未知意趣卽遣青衣令
參消息青衣還白世尊遣使取羅睺羅度爲沙彌耶
輸陀羅聞是消息將羅睺羅登上高樓約勅監官關
閉門閥悉令堅牢時大目連旣到宮門不能得入又
無人通卽以神力飛上高樓至耶輸陀羅座前而立
耶輸陀羅見目連來憂喜交集迫不得已卽起恭敬
禮拜問訊冒涉遠途得無勞也勅爲敷座請目連坐

問目連曰世尊無恙教化衆生不勞神也遣上人來
欲何所爲目連白曰太子羅睺羅年已九歲應令出家
修欲聖道所以者何母子恩愛少時如意一旦命終
墮三惡道恩愛離別窈窕冥冥母不知子子不知母
羅睺得道當還度母永離生老病死憂患得至涅槃
如佛今也耶輸陀羅答目連曰釋迦如來爲太子時
娶我爲妻奉事太子如事天神曾無一失共爲夫婦
未滿三年捨五欲樂騰越宮城逃至王田王身往迎
違戾不從反遣車匿白馬令還自要道成誓願當歸
被鹿皮衣譬如狂人隱居山澤勤苦六年得佛還國

都不見親忘忽恩舊劇於路人遠離父母寄居他邦
使我母子守孤抱窮無有生賴唯死是從人命至重
不能自刑懷毒抱恨強存性命雖居人類不如畜生
禍中之禍豈有是哉今復遣使欲求我子爲其眷屬
何酷如之太子成道自言慈悲慈悲之道應安樂衆
生今反離別人之母子苦中之甚莫若恩愛離別之
苦以是推之何慈之有白目連曰還向世尊宣我所
陳時大目連更以方便種種因緣隨宜諫喻反覆再
三耶輸陀羅絕無聽意辭退還到淨飯王所具宣上
事王聞是已令喚夫人波闍波提王告夫人我子悉

達遣目連來迎取羅雲欲令人道修學聖法耶輸陀
羅女人愚癡未解法要心堅意固纏著恩愛情無縱
捨卿可往彼重諫喻之令其心悟時大夫人即便將
從五百青衣往至耶輸陀羅所住宮中種種方便隨
宜諫喻反覆再三耶輸陀羅猶故不聽白夫人曰我
在家時八國諸王競來見求父母不許所以者何釋
迦太子才藝過人是故父母以我配之太子爾時知
不住世出家學道何故慇懃苦求我耶夫人娶婦正
爲恩好聚集歡樂萬世相承子孫相續紹繼宗嗣世
之正禮太子旣去復求羅睺欲令出家永絕國嗣有

何義哉爾時皇后聞是語已默然無言不知所云爾時世尊卽遣化人空中告言耶輸陀羅汝頗憶念往古世時誓願事不釋迦如來當爾之時爲菩薩道以五百銀錢從汝買得五莖蓮華上定光佛時汝求我世世所生共爲夫妻我不欲受卽語汝言我爲菩薩累劫行願一切布施不逆人意汝能爾者聽爲我妻汝立誓言世世所生國城妻子及與我身隨君施與誓無悔心而今何故愛惜羅睺不令出家學聖道也耶輸陀羅聞是語已霍然還識宿業因緣事事明了如昨所見愛子之情自然消歇遣喚目連懺悔辭謝

捉羅睺手付囑目連與子離別涕淚交流爾時羅睺見母愁苦長跪合掌辭謝母言願母莫愁羅睺今往定省世尊尋爾當還與母相見時淨飯王爲欲安慰耶輸陀羅令其喜故卽時召集國中豪族而告之言金輪王子今當往彼舍婆提國從佛世尊出家學道煩卿人人各遣一子隨從我孫咸皆唯然奉大王命卽時召集有五十人隨從羅睺往到佛所頭面作禮佛使阿難剃羅睺頭及其五十諸公王子悉令出家命舍利弗爲其和尚大目犍連作阿闍梨授十戒法便爲沙彌羅睺幼稚習樂傲慢耽著嬉戲不樂聽法

佛數告勅恒不從用非可如何爾時舍衛國波斯匿王聞佛子羅睺出家爲沙彌與其羣臣夫人太子後宮女婆羅門居士恭敬圍繞於其晨朝來詣佛所禮拜問訊并看佛子羅睺沙彌各一面坐佛爲說法王及羣臣憍傲習樂不堪苦坐聽佛說法辭退欲還爾時世尊知王始悟信根未立將欲開悟王及羣臣爲利益故告阿難曰汝可往召沙彌羅雲及其眷屬悉皆令集聽佛說法阿難往召須臾皆集佛告王曰且待須臾聽我說法王叉手曰今我此身習樂來久不堪苦坐願佛垂恕佛告王曰此不爲苦所以者何

前身種福今爲人王常處深宮五欲恣意出入導從腳不觸地何名爲苦三界之苦莫若地獄畜生餓鬼諸難等苦如此諸苦前已曾說佛告羅雲佛世難值法難得聞人命難保得道亦難子今旣得人身值佛在世何故懈怠不聽法耶羅雲白佛法精妙小兒意麤安能聽受世尊法也前已數聞尋復忘失徒勞精神無所一獲及今少年且放情肆意至年大時自當小差堪任受法佛告羅雲萬物無常身亦難保汝能保命至年大不唯然世尊羅雲不能佛豈不能保子命也佛語羅雲我尚不自保豈汝耶羅雲白佛

徒勞聽法既不得道聞法之功何益於人佛告羅雲
聽法之功雖於今身不能得道五道受身多所利益
如我前說般若智慧亦名甘露亦名良藥亦名橋梁
亦名大船汝不聞乎羅雲白佛唯然世尊時波斯匿
王長跪合掌白天尊曰如佛所說般若智慧有四種
名其義云何願佛哀愍爲我說之佛告王言欲得聞
者著心諦聽吾今說之佛言憶念過去無數劫時毗
摩大國徒陀山中有一野干爲師子王追逐欲食野
干惶怖奔走墮一丘井不能得出經於三日開心分
死而說偈言

禍哉今日苦所逼 便當沒命於丘井
一切萬物皆無常 恨不以身餒師子
嗚呼奈何罪厄身 貪惜軀命無功死
無功而死尚可恨 況復臭身汙人水
南無懺悔十方佛 表知我心淨無已
前世所造三業罪 願於今身償令畢
衆罪畢了三業淨 勤心不動念真實
從是世世遭明師 如法修行速成佛
時天帝釋聞佛名 肅然毛豎念古佛
自惟孤露無師導 耽著五欲自沉沒

不能得出恩愛獄
思惟感切目下淚
卽與諸天八萬衆
飛下詣井欲問詰
乃見野干在井底
兩手攀土不能出
天帝復自思念言
聖人因現無方術
今我雖見野干形
斯必菩薩非凡器
今當請問決我疑
并令諸天得聞法
不問聖教曠大久
常處幽冥無師導
仁者向說非凡語
願爲諸天宣法教
於時野干仰答曰
汝爲天帝無教訓
不知時宜甚凝惲
法師在下自處上

都不修敬問法要
法水清淨能濟人
云何欲得懷貢高
天帝聞是大慚愧
今日給侍諸天愕然笑
天王降志大無利
而被慙恥甚可悼
帝釋卽時告諸天
慎莫以此爲驚怪
是我頑弊行不稱
必當因是聞法要
卽爲垂下天寶衣
接取野干出於上
又手辭謝說不是
叩頭懺悔願垂亮
諸天實爾如尊誨
纏綿五欲致迷荒
皆由不遇善師導
爲說苦樂常無常
諸天爲設甘露食

野干得食生活望 非意禍中致斯福

心懷踊躍慶無量

於是野干心自念言畜生道中醜弊困厄無過野干
智慧力故乃至如是復作是念形殘之命本非所愛
所以稱慶大歡喜者爲通化耳此諸凝天皆蒙帝釋
先有般若一毫之分共相隨來皆欲聞法而自歎言
奇哉奇哉何慰如之今當通化成我功德復作是念
今日之恩莫不由我先師和尚慈哀教授智慧方便
功德力乎南無我師南無我師南無般若南無般若
雖復失行生惡趣中猶識宿命知其業緣般若之力

能感諸天降神來下接濟供養復得通化展我微心
時天帝釋告諸天曰如師言者定欲說法我等今來
快得善利今當人人叩頭丹誠請令說法咸然唯諾
卽各修敬偏袒右肩圍繞野干長跪合掌異口同音
而說頌曰

善哉善哉 和尚野干 唯願說法

開化天人

天人幽冥

五欲所纏

恒恐福盡

無常所遷

死墮惡道

求拔良難

從久遠來

數萬億年

今始一遇

良祐福田

唯垂慈哀

宣示法言

天人得福

衆生亦然

願與和尚

永劫相連

至成佛道

常作因緣

明人難值

故立誓焉

於時野干見諸天人慇懃勸請樂欲聞法益加踊躍告天帝曰憶念我昔曾見世人欲聞法者先敷高座莊飾清淨方請法師登座說法所以者何經法貴重敬之得福不宜輕心自虧福也諸天聞已咸言唯諾脫天寶衣積爲高座須臾之間莊校嚴飾清淨第一野干升座告天帝曰吾今說法正當爲二天因緣故何等爲二者說法開化天人福無量故二者爲報施食恩故豈得不說天帝曰免井厄難得全身命功報應大尊者云何說法報恩不及此耶所以者何一切天下皆樂生求安無欲死者以是因緣全命之功豈得不大野干答曰死生之宜各有其人有人貪生有人樂死何人貪生其人生世愚癡幽冥不知死已後世更生違佛遠法不遭明師殺盜姪欺唯惡是從如是之人貪生畏死何人樂死遭遇明師奉事三寶改惡修善孝養父母敬事師長和順妻子奴婢眷屬謙敬於人如斯之人惡生樂死所以者何善人死者福應生天受五欲樂惡人死者應入地獄受無量

苦善人樂死如囚出獄惡人畏死如囚入獄天帝問曰如尊所說全其軀命無功夫者誠如所言其餘二功施食施法有何功德唯願說之開化盲冥野干答曰布施飲食濟一日命施珍寶物濟一世乞增益生死繫縛因緣說法教化名爲法施能令衆生出世間道出世間道凡有三種一者羅漢二者辟支佛三者佛道此三乘人皆從聞法如說修行又諸衆生免三惡道苦受人天福樂皆由聞法是故佛說以法布施功德無量天帝白言師今此身爲是業報應化身乎野干答曰是罪業報非應化也天人聞已肅然驚怖

悲哀傷心垂淚滿目更起修敬白野干曰我意謂是菩薩聖人應現濟物而今方聞罪業果報未知其故唯垂哀愍說其因緣野干答曰欲聞者善吾今說之憶念古世生波羅奈波頭摩城爲貧家子名阿逸多刹利種姓幼懷聰明好學是欲至年十二追隨明師在於深山辛苦奉事研精習學翹勤不懈師亦晨夜切磋教授不失時節經五十年九十六種經書記論醫方呪術占相吉凶災異禍福靡所不達高才智德名聞四遠時阿逸多伏自惟曰今日之濟莫不由我尊師和尚教化之恩其功難報家既貧乏無爲供養

唯當賣身以報師恩作是念已長跪白師弟子今者欲自賣身以報師恩其師答曰山居道士乞食自存正無所乏子今何爲毀賣貴身爲供我也子今成就智慧辯才當轉教化天下人民爲法燈明教化之功豈不足報我之恩也幸可不須餘舉動也時阿逸多既是智人不違師教留住山中乞食自存如是不久國王崩亾羣臣集議宣令國界諸名學士普召使集令共講論誰得勝者當立爲王時阿逸多應召來集與諸學士五百餘人七日之中共揜試議無有勝者羣臣歡喜召婆羅門拜阿逸多紹爲國王時阿逸多

見是事已憂喜交集而作是念若作王者恐有慳溢貪求快意爲民致患死入地獄受苦因緣若不爲者家貧無祿無以供養報師重恩思計反覆聽當受之爲報師恩并養父母思惟是已享受王位受王位已卽遣中臣嚴駕寶車幢旛曲蓋香華妓樂百種飲食就山迎師還國供養別立宮舍七寶廁墳彫文刻鏤衆綵雜飾床臥被褥飲食醫藥華果園林流泉浴池莊校嚴好以供養師阿逸多王與國臣民夫人婦女日日從師受十善法經一百年爾時邊境有二小國其二小王共相怨嫉私立兵馬共相誅伐終於多年

各不相得其一國者名安那羅一國者名曰摩羅婆耶安那羅王召諸羣臣集共議言當作何方令得彼國諸臣答言阿逸多王出生寒賤雖居王位寒意猶在從昔已來奉持十善不犯外色雖有宮女其年並宿如臣計者檢括國中不問豪賤選擇名女足一百人年少端正堪適意者莊嚴香潔遣忠良臣賈持重寶并諸侏女往貢獻之若其納者當從王請強兵百萬助往攻之無往不伏卽隨其計名女寶物一時悉辦遣忠良臣往奉獻之阿逸多王得諸美女及珍寶物甚大歡喜問使者言彼王奉我如斯好物欲望何

報使者白王摩羅婆國是大王所統彼王頑嚚不知禮度姪亂無道不理國政民被其毒視之若怨特從大王請兵百萬助往伏之奉獻之誠其正在此王曰甚善卽令簡閱強兵百萬以送與之安那羅王自簡國中得百萬人一時相助鳴鼓往伐百日之中鬪戰傷殺人死過半方得勝彼摩羅婆王悉被刑斬及其宗族數千萬餘一時傾沒阿逸多王旣得諸女意迷情感忘失本志奢姪著樂不理國政衆官羣僚相與作亂良民之子略爲奴婢風雨不時饑餓滿道異方怨敵遂來侵掠阿逸多王從是失國遂致亾沒從是

死已生地獄中身被楚毒緣前學問智慧力故卽識宿命心自悔責改惡修善須臾之間地獄命終生餓鬼中復識宿命卽復悔過修念十善須臾之間餓鬼中死生畜生中受野干身智慧力故復識宿命改往修來奉持十善復行轉教諸餘衆生令行十善近逢師子當時怖懼墮丘井中開心分死冀得生天離苦受樂由汝接我違失本願方經辛苦何時當免是故我說汝濟我命無功夫也天帝難曰如尊語者善人求死是事不然何以故師在井底若不入衣則不得出若不得出自不得生今所緣得生由師入衣是故

當知非不欲生云何說言不貪生耶野干答曰吾今所以入衣之意正爲三事大因緣故何謂爲三一者入衣不違天帝本志願故夫人違志不果所願則致大苦施人苦惱在在所生所願不果所求不得所向不偶自致苦惱爲是等故非爲生也二者入衣見諸天意欲得聞法欲爲諸天宣通正法不吝法故如當不說則爲吝法吝法之罪世世所生聾盲瘡瘍諸根閉塞生於邊地癡騃無智雖生好處情頑闇鈍所學不成學不成故自致苦惱爲是等故非爲生也譬如世人因其前世布施修善福德因緣今生爲人所願

從心富有財物貧者求乞慳心吝惜不肯施與慳貪
果報生餓鬼中常患饑渴裸形無衣冬時寒凍身體
破裂暑時大熱無依蔭處如是苦惱數千萬歲餓鬼
罪畢生畜生中食草飲水癡無所知或食泥土汙露
不淨慳貪罪故受報如是吝法之憊亦如此焉三者
入衣正爲宣傳通法化耳利益天人令開悟故名爲
法施功德無量爲是等故非求生也天帝問曰教化
之功其福云何唯願說之野干答曰宣傳正化能令
衆生知死有生作善獲福爲惡受殃修道得道緣是
功德轉身所生智慧明了常識宿命若生天上爲諸

天師若生世間爲金輪王常以十善教化天下若爲
人王治以正法常識宿命識宿命故心不放逸人居
尊寵受五欲樂多有魔事來相沮壞令人意惑造起
惡業雖復失行受惡報時智慧力故速得免苦生天
福樂智慧光明漸漸增長成菩薩行至無生忍是故
佛說教化之功其福無量天帝喜曰善哉善哉誠如
尊教我等諸天今日始知財施法施功德因緣差別
之相其財施者譬如寸燈明小室中其法施者猶若
日光照四天下隨所行處能除闇冥所以者何日性
自明故能照物和尚今者亦復如是本修習故智慧

明了復以慧明除衆生闇於時天帝說是語已八萬
諸天咸然起立正服修敬長跪合掌白野干曰願尊
垂愍授十善法多所饒益利安衆生亦令和尚功德
轉增答曰善哉宜知是時告天帝曰受戒之法先當
懺悔淨身口意何謂身業殺盜邪姪何謂口業妄言
兩舌惡口绮語何謂意業嫉妬瞋恚慢邪見是謂
十事禁身口意業不犯衆惡名爲十善態身口意造
衆惡業名爲十惡一心丹誠悔除十惡十惡滅故身
口意淨三業淨故名爲十善天帝問曰十善之功效
報云何野干答曰曾聞師說人行十善十善果報生

六欲天七寶宮殿五欲自然百味飲食壽無量命父
母妻子六親眷屬端正淨潔歡喜快樂假令諸天持
十善者天上福盡還生天中福報轉勝不同世人十
善報也所以者何世人修善心道三戒難可護持不
瞋戒者先須方便行於慈心然後能得成不瞋戒世
人行慈難得久停如刀破水隨破隨合持不瞋戒亦
復如是嫉妬戒者發有時節云何時節見他得利見
他快樂見他端正見他勇健見他聰明見他修福以
要言之一切勝事爾時其心方生嫉妬是故當知嫉
妬之心發起有時其憍慢心起亦有時見愚癡者心

起憍慢見醜陋人見不淨人見貧窮人以要言之聲
盲跛僂諸根不具夷蠻胡虜憍慢之心見時方起是
故當知不憍慢戒發起有時是故世人心戒難持雖
復強持乍得乍忘是故世人十善果報雖受天福不
如諸天十善功德光明神力食祿相好巍巍第一識
宿命事皆亦如是是故當知天人修行十善果報勝
於世人天帝白曰如尊所說人行十善心道三戒難
爲護持天人亦爾嫉妬瞋恚憍慢邪見如是等心未
嘗不有云何福報勝世人耶野干答曰天人雖有不
同世人所以者何天人福德苦少樂多煩惱心輕世

人薄福樂少苦多煩惱心重天帝白曰諸天昔來習
樂心麤猶若猿猴今持十善後脫廢忘虧犯之時當
云何也野干答曰曾聞師說人行十善若有犯失行
惡業者當就賢明福德之人隨所犯事發露懺悔更
從受之如是行者不失戒也所以者何十善戒者譬
如穀苗煩惱如草草與穀苗互共相妨欲長苗故當
除草穢穀苗淨故收實必多穀實多故終無饑乏爾
時天帝及八萬諸天聞是事已甚大歡喜不復憂慮
福盡無常受惡趣報復自惟曰行善功德雖無苦報
然有生死不免無常兼有他化自在天王見人修福

心懷嫉妬爲作留難忘失善道令造惡業惡業因緣應受苦報白野干曰修何功德常得不死不令魔王所惑亂也野干答曰曾聞師說發菩提心修菩薩業魔王波旬不能沮壞心不惑故在在所生智慧明了慧明了故常識宿命識宿命故不起惡業心清淨故得無生法忍無生法忍故於道不退遠離生死憂苦惱患天帝白曰修菩薩道應行何法野干答曰曾聞師說求佛道者從源而起先當廣學諸法因緣解因緣故信心堅固信根立故能起精進精進力故不起一切惡業因緣純善之心無放逸故智慧成就智慧力故總攝一切三十七品助菩提道天帝問曰如尊教者三十七品其義弘深非是麤懷卒能得了云何得入菩薩道行野干答曰曾聞師說修菩薩道者先以方便調伏諸根何謂方便謂六波羅蜜四無量心是名方便調伏諸根天帝白曰六波羅蜜其義云何唯願說之野干答曰第一布施破慳貪心無遺惜故二者守善不行惡故三者遭逢惡事心能堪忍不懷不邪念故六者修習智慧照除煩惱無明闇故是則名爲六波羅蜜方便之力調伏諸根復有四事調伏

諸根何謂爲四一者慈心二者悲心三者喜心四者捨心是爲四事名無量心天帝問曰云何行慈野干答曰見苦厄人當起慈心爲作救護皆令得所何謂爲悲見諸衆生無明愛故造生死業五道受苦不能自免是故我今不應懈怠常勤精進修習智慧速成佛道得佛道已當以智慧光明照除衆生無明黑闇令見大明免衆苦縛雖未成佛凡所施爲一切善業迴施衆生令得安樂衆生有罪我當代受是名悲心何謂爲喜若見世人修行善業求三乘果勸助隨喜見受樂人心亦隨喜見端正人見勇健人見富貴人見智慧人見慈心人見孝順人以要言之一切善人勸助隨喜是謂喜心何謂爲捨凡所施爲一切功德行恩於人不望現報不望生報不望後報是名爲捨成就四事名四無量心衆生無量故慈心無量衆生無量故悲亦無量衆生無量故喜亦無量衆生無量故捨亦無量是故名爲四無量心連前六度名十波羅蜜十波羅蜜總攝一切菩提道行時天帝釋聞野干說十善行法功德因緣復聞菩薩行菩提道因緣義趣疑網結解歡喜踊躍充徧其身卽與八萬侍從諸天更起修敬又手合掌白野干曰弟子今日八萬

見智慧人見慈心人見孝順人以要言之一切善人勸助隨喜是謂喜心何謂爲捨凡所施爲一切功德行恩於人不望現報不望生報不望後報是名爲捨成就四事名四無量心衆生無量故慈心無量衆生無量故悲亦無量衆生無量故喜亦無量衆生無量故捨亦無量是故名爲四無量心連前六度名十波羅蜜十波羅蜜總攝一切菩提道行時天帝釋聞野干說十善行法功德因緣復聞菩薩行菩提道因緣義趣疑網結解歡喜踊躍充徧其身卽與八萬侍從諸天更起修敬又手合掌白野干曰弟子今日八萬

諸天一心同時發菩提心如和尚說菩薩道行當具奉行唯願和尚隨喜聽許野干答曰宜知是時斯則是其本心所望於時天帝白野干曰和尚飲食法用云何唯願教示當設供養野干答曰其所食法不中人聞何以故罪業因緣所食之物極是不淨形似畜生不異餓鬼幸不須問其所食物天帝白曰和尚飲食好亦當示惡亦當語弟子今當隨所便宜施設供養野干答曰常食師子虎狼屎尿及食塚間死人骸骨弊衣皮革脫不能得如斯之食饑窮所逼亦食泥土罪苦果報從生至死雖食不淨未曾充飽時天帝

釋及諸天衆聞野干說飲食之相悲哀感結涕淚傷心白野干曰弟子意欲施設供養如師言者所願不果非可如何今還天宮當作何方報師重恩野干答曰汝等今者從我聞法還於天上展轉教化開悟諸天不問男女乃至一人令信受行非但報我亦報一切諸佛之恩隨所教化而自增長諸天福德何況教化開悟多人功報無量諸天起立白野干曰弟子之徒今還天宮未審和尚何時當捨此罪報身得生天堂得相見也野干答曰限至七日當捨罪身生兜率天汝等便可願生彼天何以故兜率天中多有菩薩

說法教化爲諸天人求佛道故天帝白曰如尊教者弟子眷屬於忉利天福盡命終皆當生彼兜率陀天與師相見奉侍教授誓如今也說是語已以天華香散野干上於是別去諸天去已於時野干不離本座一心專念十善行法不行求食七日命終生兜率天爲天王子復識宿命復以十善教化諸天佛告王曰爾時野干卽我身是時天帝釋舍利弗是時阿逸多教授大師憂波達者彌勒是也八萬諸天者今娑婆國土八萬菩薩不退者是佛告大王憶念往昔從初發意修菩提行乃至無生於其中間常與彌勒舍利

弗等爲求法故勤加精進不顧軀命追逐明師親近奉侍研精學問成就智慧智慧力故於五道中隨所生處教化成就無量衆生令得度苦至今成佛皆由般若智慧方便斷除一切結習因緣成等正覺復以智慧於娑婆國土教化衆生度三有苦是故我說般若智慧有四名義時波斯匿王及其眷屬聞佛說已心意開解更起作禮歡喜踊躍侍立合掌而白佛言世尊今來見佛快得善利聽佛說法不知疲懈所以者何世尊先說四真諦法十二因緣出世間道情根鈍故慌慌不解以不解故身體疲憊今聞佛說菩薩

行法雖未全解心甚愛樂渴仰欲聞情無厭足弟子
今欲發菩提心求無上道唯願世尊哀愍聽許教示
菩薩所行法度當如說行佛告王曰菩薩行法如上
所說身口意業十善道行十波羅密總攝一切助佛
道法汝能行乎王曰如世尊說十善行法心道三法
難得護持當云何受令不漏失佛告王曰世人心麤
譬如猿猴爲諸煩惱風所動轉是故欲行十善道者
不得遲久欲修十善當限三時何謂三時從晨至食
名爲上時經一食頃名爲中時行百步時名爲下時
受十善法隨其所堪於一時中將護其心堅持三戒

無令漏失是則名爲修行十善王曰如世尊說限三
時持十善行者其功益微云何生福佛告王曰人修
十善時節雖促功報彌廣何以故心道三戒難守護
故雖少時持果報無量譬如有人於百年中積聚薪
草以火焚之須臾滅盡是故當知少時修善能滅無
量惡業重罪又如鑽火加勤用力須臾得火火之功
力能燒天下草木叢林傾盡乃息大王當知人修十
善亦復如是須臾之功能滅無量惡業重罪能令行
者起菩提芽萌芽成故漸漸增長至成佛果王聞是
已更起作禮甚大欣慶得未曾有白世尊曰弟子今

者大得善利所以者何聞世尊說修十善道功德因緣能令衆生成菩提弟子今者志樂菩提當勤修行心不退却佛說是時隨從王者羣臣吏民後宮夫人四部弟子天龍鬼神人非人等五千餘人皆發無上菩提道意爾時波斯匿王國太夫人出入行來常使四人名扇提羅最大筋力扇提羅者此言石女無男女根故名石女令此四人擔皇后輦皇后所乘七寶輦輶留在祇桓精舍門外勅諸黃門令守護之黃門轉令四扇提羅守夫人輶其身自往佛邊聽法扇提羅等各於輶下睡眠不覺時有凶人偷取夫人珍寶輶輶一摩尼珠爾

時黃門暫出看輶不見寶珠心中惶怖懼夫人責問石女言使汝守輶何故偷珠各各答言實不偷也黃門大怒鞭打石女苦痛徹骨時有一石女自知不偷橫受楚毒奔走逃突入精舍中稱怨大喚大眾皆聞莫知所由佛語阿難汝可出往彼黃門所無令橫鞭無過之人何以故此四石女者乃是皇后前世之師自無過罪何以橫鞭自造後世惡業因緣是時皇后聞佛此語卽起恭敬合掌白佛如世尊說四擔輶石女乃是皇后前世時師迷意不解唯願世尊說其因緣令諸會衆普得聞知佛告皇后喚石女來於世尊

前驗其虛實皇后奉命卽遣黃門攝之將來時四石女見佛叩頭涕哭長跪合掌白世尊曰實不偷珠有何因緣橫罹此罪鞭打楚痛身體破壞世尊答曰罪業因緣自身所造非父母爲非從天墮人行善惡受苦樂報如響應聲貪現前利心行邪詭不知後世累劫受殃夫惡從心生反以自賊如鐵生垢消毀其形王又手白佛前後說法皆有因緣今四石女先世本業有何因緣願佛爲說開悟盲冥多所利益衆人蒙祐

未嘗有因緣經卷上

音釋

窮	於皎切	劇	奇逆切	酷	苦沃切	稚	直利切	憊	居
<small>深遠也</small>		<small>甚也</small>		<small>毒也</small>		<small>幼小也</small>		<small>憊也</small>	
妖	切恣也	懨	古岳切	廁	初吏切	填	徒年切	鏤	落
<small>五到切</small>	<small>倨也</small>	<small>擒校也</small>		<small>間廁也</small>		<small>填滿也</small>		<small>候</small>	
刻	切離	嚚	巾切	察		駭	五駭切	裸	郎果切
<small>也</small>	<small>疑也</small>	<small>頑嚚也</small>		<small>欲雪切</small>		<small>駭也</small>		<small>赤體也</small>	
跛	布火切	足	方主切	蠻	謀還切	虜	郎古切	北	
<small>偏廢也</small>		<small>僂</small>	<small>僂僂也</small>	<small>蠻</small>	<small>南蠻也</small>	<small>虜</small>	<small>北</small>		
惛	呼廣切	猿	于元切	鈞	舉欣切	餗			
<small>昏也</small>		<small>猴戶鉤切</small>		<small>骨絡也</small>					

金 壇居士王鏡施貲刻此
未曾有因緣經上卷以資

先 疢霽宇府君冥福
襄陽性融對上元王自謙書許一科刻

萬 历壬子歲春秋八月徑山化城識

未曾有因緣經卷下

蕭齊二藏沙門釋曇景譯

佛告王曰欲聞者善著心諦聽吾當與汝分別說之
佛復惟曰今我法中有諸比丘言行不同心口相違
或爲利養錢財飲食或爲名譽要集眷屬或有厭惡
王法使役出家爲道都無有心向三脫門度三有苦
以不淨心貪受信施不知後世彌劫受殃償其宿債
爲是等故豈得不說佛告王曰憶念過去無數劫時
有一大國名裴扇闍有一女人名曰提韋婆羅門種
夫喪守寡其家大富都無兒息又無父母守孤抱窮

無所恃怙婆羅門法若不如意便生自燒身諸婆羅門時時共往到提韋所教化之曰今身之厄莫不由汝前身罪業何謂爲罪不敬奉事諸婆羅門又不孝順父母夫婿復無慈心養育兒子有是罪故致令今身抱孤守厄汝今若不修福滅罪後世轉劇墮地獄中當爾之時悔無所及提韋問曰當作何福得滅罪耶婆羅門曰滅罪二種其罪輕者手自髡頭香湯洗浴入天廟中懺悔辭謝那羅延天請婆羅門足一百人施設飲食設飲食已以乳牛百頭從犢子者覬婆羅門然後罪滅所以者何諸婆羅門修淨梵行不食

酒肉五辛葱蒜唯仰牛乳以爲食資令施王檀越滅罪生福世世所生所願從心汝今罪重應以家中一切所有諸珍寶物布施五百大婆羅門諸婆羅門得布施已當爲呪願令汝後生常得大富欲滅重罪者於恒水邊積薪自燒諸婆羅門當復呪願令汝前身所造一切輕重過罪一時滅盡後世更生無復餘殃父母兄弟夫婿兒子壽命無量快樂無極於是提韋便許可之決定開心當自燒身便勑家奴將十乘車入山伐樵規以自燒爾時國中有一道人名鉢底婆
此言辯才也精進持戒多聞智慧常以慈心教化天下令

改邪就正捨惡修善傳聞提韋欲自燒身心生憐愍往詣其所問提韋言辨具薪火欲何所爲提韋答言欲自燒身滅除殃罪辯才答曰先身罪業隨逐精神不與身合徒苦燒身安能滅罪夫人禍福隨心而起心念善故受報亦善心念惡故受惡果報心念苦樂受報亦爾如人餓死則作餓鬼苦惱死者受苦惱報歡喜死者受歡喜報安隱快樂果報亦爾汝今云何於苦惱中求欲滅罪望善報也幸可不須於理不通復次提韋如因病人爲苦所逼若有惡人來至其所呵罵病人以手搏耳於意云何爾時病人寧有善心

無忿惱不提韋答言其人困病未見人時常懷忿惱況被搏耳而當無怒辯才答曰汝今如是先身罪故守窮抱厄常懷憂惱復欲燒身欲離憂惱當可得不如因病人得人呵罵尚增苦惱百千萬倍況自燒身猛炎起時身體熾爛氣息未絕心未壞故當爾之時身心被責識神未離故受苦毒煩悶心惱從是命終生地獄中地獄苦惱尤轉增劇百千萬倍求免甚難況欲燒身求離苦也復次提韋譬如車牛厭患車故欲使車壞前車若壞續得後車輶其項領罪未畢故人亦如是假令燒壞百千萬身罪業因緣相續不滅

如阿鼻獄燒諸罪人一日之中八萬過死八萬更生
過一劫已其罪方畢況復汝今一過燒身欲求滅罪
何有得理爾時辯才種種因緣爲說正法提韋女人
心開意解改志易操燒身息息白辯才言當設何方
令得滅罪辯才答言前心作惡如雲覆月後心起善
如炬消闇汝今幸有欲滅罪意自有方便今能令汝
不費一錢乃至不經毫分之苦滅除殃罪現世安隱
後更生處善願從心提韋聞已心大歡喜憂怖卽除
如重罪囚蒙赦欲出卽起修敬禮拜問訊卽勅婢使
爲敷高座氍毹毳氈錦繡綻嚴飾第一散華燒香

勸請辯才令登高座辯才受請卽升高座提韋女人
卽率家內奴婢眷屬五百餘人圍繞辯才叩頭恭敬
合掌而立提韋女人白辯才言尊向所說滅罪事由
雖懷欣慶猶有微疑唯願爲說除罪之法當如法行
辯才答曰起罪之由出身口意身業不善殺盜邪姪
口業不善妄言兩舌惡口绮語意業不善嫉妬瞋恚
憍慢邪見是爲十惡受惡果報今當一心丹誠懺悔
若於過去若於今身有如是罪今悉懺悔出罪滅罪
當自立誓從今已往不敢復犯并爲我等先人父母
夫婿兄弟所有過罪我今一心代其懺悔弟子提韋

以今懺悔改惡修善福德因緣施與一切受苦衆生令其得樂衆生有罪我當代受復立誓言緣我今日改邪就正悔罪修福從是因緣捨身受身至成佛道常遭明師遇善知識壽無量命常與父母夫婦兒子六親眷屬常相保守不經苦患莫如今也於是辯才告提韋言悔過滅罪法皆如是於是提韋及其眷屬於辯才前長跪合掌白辯才言弟子之徒奉尊教誨如法懺已願尊更賜餘善法教當勤奉行增本功德辯才告曰今當誠心歸佛歸法歸比丘僧如是三說今當盡形受十善道我弟子某甲從今盡形不殺不盜不邪淫是身善業不妄言兩舌不惡口綺語是口善業不嫉妒瞋恚慢邪見是意善業是則名爲十善戒法爾時辯才教授提韋十善法已提韋眷屬歡喜踊躍盡心奉行提韋女人爲設種種百味飲食及諸珍寶於辯才前長跪又手白辯才言願尊留神垂愍教化今當爲尊造立宮室隨所便宜終身奉事辯才答曰汝今以能捨邪就正淨修十善爲正法子復以十善教化天下則爲已報師徒重恩汝已得度我不宜留吾今復當往化餘處爾時提韋知師不住運輦庫藏諸珍寶物以奉上師冀得留意辯才不受辭

退便去於是提韋心自念言今日之濟莫不由我尊師和尚開悟成就教授重恩苦請不留又復不受珍寶之物當如之何悲感傷心涕淚交流叩頭辭謝於是別去辯才去後提韋女人與其眷屬五百餘人常以十善展轉相化經於多時爾時國中忽遇穀貴人民饑餓時有五比丘懶惰懈怠不修學問經書義理又不專行持戒精進世人輕慢不供養之貧窮困苦無復生理五人議曰夫人生計隨時形儀人命至重不宜守死各共乞索辦具繩牀於曠野中掃灑淨潔華旛莊嚴依次而坐外形似禪內思邪濁世人見之

謂是聖人賚持供養百種飲食雲集供養於是五人飽足有餘爾時提韋聞是事已遣人訪覓信還報曰有五聖人獨坐山澤世人雲集如事天神提韋聞已心大歡喜而自慶言我願果矣明日卽勅嚴駕寶車香華妓樂百種飲食詣五比丘提韋到已禮拜問訊施設供養飲食畢已提韋眷屬恭敬合掌白比丘曰

尊德至重

無上福田

衆生蒙祐

不宜自輕

弟子愚意

欲請尊靈

臨顧貧舍

展釋微誠

唯願慈哀

濟度羣生

弟子亦有

清淨園林

流泉浴池 嚴飾光榮

提韋眷屬叩頭再三時五比丘知其意至便許可之
提韋歡喜辭還家中卽遣使人莊嚴寶車迎五比丘
還家供養提韋女人有好園林去舍不遠其園縱廣
足滿十頃流泉浴池奇華異果鳩鵠鷺鷥清淨嚴好
於其園中造立堂舍衆寶莊校其堂舍中敷置牀席
衆好臥具香潔第一令五比丘止住其中提韋女人
終身給事隨時便宜飲食湯藥供養使令不失時節
時五比丘旣被主人恩厚供養安隱快樂而自慶言
何慰如之夫人生世種種方宜求覓財利以救貧乏

雖得如意不如我等都不勞身而食福祿此豈不由
智慧力乎其五比丘察見主人慇懃意重而共議言
雖得主人隨宜供給日富歲貧不能濟人歲寒富樂
我等今宜更施方便求覓錢財充爲後時受五欲樂
作是論已更相易代差遣一人遊諸聚落宣語諸人
唱如是言彼四比丘閑居寂靜護持禁戒斷絕酒肉
不食葱蒜稱於梵行修禪止觀證無漏業不久修行
成阿羅漢則爲天下無上福田衆人聞已賚持種種
錢財飲食運集來詣恭敬供養如是多年提韋女人
直心敬信隨宜供養歡喜無厭壽盡命終生化樂天

其五比丘專行巧僞邪濁心故福盡命終生地獄中
八千億劫受大苦報地獄罪畢受餓鬼形魁魅魍魎
如是展轉經八千劫餓鬼罪畢受六畜身償其主人
先世供養業報因緣或作駱駝驢馬隨其主人
所受福處常以筋力報償主人如是展轉復八千世
畜生罪畢雖獲人身諸根闇鈍無男女根名爲石女
自爾以來八千世中常以筋力報償主人於今不息
佛告王曰爾時提韋者皇后是也爾時辯才者目連
是也時五比丘卽今皇后隨從擔舉扇提羅等五人
是也王白佛言如世尊說五人起因今者唯見擔舉

四人其餘一人爲何所在佛告王曰其一人者常在
宮內修治廁溷除糞者是皇后聞已肅然毛豎心懷
怖懼更起禮佛侍立合掌而白佛言如世尊說扇提
羅等是我前世因緣師者實懷憂怖恐犯逆罪所以
者何夫人師者應修恭敬頂戴禮拜是其宜也而反
使擔舉不異牛馬以是因緣甚懷怖懼願佛垂哀聽
我懺悔佛告之曰皇后福德自無過罪何故疑懼衆
生殊性業行不同善者受福惡自受殃皇后本時直
心清淨信樂修福福德因緣自爾以來世世所生常
遭明師信受教誨從善入善從祿入祿至於今日食

福自然值佛出世前身福德因緣力故復聞正法如說修行以是因緣無罪咎也其扇提羅五人因緣由其本時邪濁佞諂無有慈心受汝供養罪業因緣償其宿債皇后白曰今聞佛說本業因緣弟子疑解無憂懼也此扇提羅罪業果報何當畢耶弟子今者放扇提羅不敢驅使隨意東西唯願世尊說法開悟令其心解改惡修善速得免苦佛告之曰今欲令我開化其者喚彼宮內除糞者來皇后卽時遣使令喚扇提羅來使者受命須臾將來扇提羅等五人聚集於佛前立世尊大慈先以善言慰勞之曰汝等諸子體

氣康和安隱快樂無苦惱不五人怒曰佛不知時所以者何晝夜勤苦鞭打使役不暇得息有何樂哉佛豈不知如是事乎而反問人快樂以不佛告五人今身之苦皆由前世邪濁諂曲懷不善心受人供養罪業因緣展轉所生至於今身償罪因緣猶故未畢若欲求免惡果報者今應至心丹誠悔過改惡修善從是因緣可得免苦扇提羅等聞佛語已忿怒隆盛反背向佛不欲聽聞佛以神力令一化佛對其前立方便慰勸令懺悔扇提羅等又反向東復有化佛對前而立復反向西復有化佛四維上下皆有佛對扇

提羅等見佛圍繞五人卽時稱怨大喚而作是言我等今者是弊惡罪人佛今何爲苦見逼耶爾時世尊還攝化佛爲一佛身佛告大衆國王太后諸比丘等汝等見是扇提羅不咸言唯然汝等當知衆生罪業有二種障一者業障二者煩惱障其罪輕者有煩惱障重罪業障扇提羅等具有二障重罪障故不得受化非可如何爾時皇后見扇提羅不受佛化哀感傷心語五人曰自今以後永解因緣隨意東西無憂快樂扇提羅等長跪涕淚白皇后言我等五人奉事大家有何等憊非意今日被驅棄捐若有不稱唯願弘

恕使役如前於是皇后辭讓再三扇提羅等不欲離去皇后白佛弟子至意放扇提羅不肯欲離當如之何佛告之曰扇提羅等償債未畢因緣繫縛不令得去非可如何且順其意復其事業償因緣畢自當得脫佛告王言夫人修福謙虛敬重直心清淨行於道業功德無量火不能燒水不能漂偷劫盜賊不能得便國王強力不能動轉如今皇后受福報也人行惡心貪現前利如扇提羅歷世受殃於今不息雖遇聖化如風過耳罪業力故反生怨嫉窈冥冥何時當免爾時世尊慈悲心故告諸比丘如我前說人身難

得值佛時難法難得聞終壽亦難汝等諸子前身微
善得生人道遇佛在世聞法信受割斷恩愛離別父
母兄弟妻子六親眷屬出家爲道如囚免獄應捨惡
從善中表相應言行無異少欲知足不貪世榮忍饑
耐渴志存無爲研精學問棄捐衆惡莊嚴智慧修無
漏業出生死海復以智慧順化天下使行十善是則
名爲自度度人應菩薩業爾時會中有諸比丘聞佛
說已自忖所行身口意業不稱道法五百餘人卽起
修敬叩頭懺悔叉手合掌而白佛言如世尊教三不
善業我等悉有今於佛前發露懺悔唯願天尊表察

其誠從今以往誓不爲非當如法行願佛證知佛言
諸子三界聖尊衆生之父子今悔惡修善甚是所欣
當隨爾喜復次五百麤行比丘聞說是已卽起修敬
叩頭向佛白言世尊我等不堪修出家道所以者何
從昔已來爲利養故行於邪濁有虛無實受人供養
負債滋多爲是等故實懷憂懼今欲捨道還歸俗緣
願佛垂聽佛告比丘善哉善哉吾助爾喜所以者何
夫人入行如把刃持毒不能堪者不如不爲何以故
執持不勤反爲害故汝等今者信於業報有慚愧心
慚愧因故除滅過罪增長善根彌勒菩薩後成佛時

初會說法當得上度又告比丘寧割身肉以用供口
不以邪心受人施也甚難甚難慎之慎之爾時佛子
羅睺羅等五十沙彌聞佛說彼扇提羅等禍所由起
因緣本末甚大憂懼卽各修敬頭面禮佛又手合掌
白言世尊今聞說此扇提羅等宿業因緣受苦果報
甚懷怖懼所以者何和尚舍利弗大智福德爲國中
豪族所見知識衆人競共雲集供養餉致最上甘珍
美味小兒愚癡無有福德食人如是妙好飲食後世
當復償其因緣受苦果報如扇提羅是故我等實懷
憂慮彼諸長德五百比丘尚不能堪退道還俗而況

小兒無智慧者願佛垂哀賜聽我屬捨道還家冀免
罪酷不經苦厄爾時世尊告羅睺羅汝今畏罪欲得
還家求離苦者是事不然何以故如有二人乏食饑
餓忽遇主人爲設種種肥濃美味其人饑餓貪食過
飽然此二人一者有智二者愚癡有智之人自知食
過身體沉重煩申欠呴恐致苦患卽詣明醫謙虛下
意叩頭求哀請除苦患良醫卽賜摩檀提藥令其服
之其人卽吐腹中宿食吐宿食已令近暖火禁節消
息其人因是得免禍患終保年壽安隱快樂其無智
者不知食過謂是鬼魅消費家財橫殺生命祠祭鬼

神欲求濟命唐費功夫腹中宿食遂成生風生氣轉筋絞切心痛因是死亾生地獄中兩世受苦由無智焉佛言汝羅睺羅畏罪還家如彼無智愚癡人也夫人求福欲離罪者當謙虛精勤親近明師修習智慧悔惡罪業改往修來從是漸漸智慧成就慧成就故消滅衆罪如我前說日光威力能除衆冥人修智慧亦復如是緣汝先有善根因緣遭值我時舍利弗等如彼明醫能濟苦患而得不死子今何爲捨明入闍沙彌羅睺白言世尊諸佛智慧猶如大海羅睺等心猶如毫末豈能受持如來智慧佛告羅睺如天雨沛

後不及前雖不相及能滿大器修學智慧亦復如是從小微起終盛大器盛大器已轉盛餘器如是展轉滿無量器是則名爲自利利人自利利人名爲大士如我今也羅睺羅等聞佛說已心開意解無復憂慮如世尊教當具奉行不敢疑也爾時會中國王太子名曰祇陀聞佛所說十善道法因緣果報無有窮盡長跪叉手白天尊曰佛昔令我受持五戒今欲還捨受十善法所以者何五戒法中酒戒難持畏得罪故世尊告曰汝飲酒時爲何惡耶祇陀白佛國中豪強時時相率賈持酒食共相娛樂以致歡樂自無惡也

何以故得酒念戒無放逸故是故飲酒不行惡也佛
言善哉善哉祇陀汝今以得智慧方便若世間人能
如汝者終身飲酒有何惡哉如是行者乃應生福無
有罪也夫人行善凡有二種一者有漏二者無漏有
漏善者常受人天快樂果報無漏善者度生死苦涅
槃果報若人飲酒不起惡業歡喜心故不起煩惱善
心因緣受善果報汝持五戒何有失乎飲酒念戒益
增其福先持五戒今受十善功德倍勝十善報也時
波斯匿王白佛言世尊如佛所說心歡喜時不起惡
業名有漏善者是事不然何以故人飲酒時心則歡

喜歡喜心故不起煩惱無煩惱故不行惱害不害物
故清淨三業清淨之道卽無漏業世尊憶念我昔遊
行獵戲忘將廚宰於深山中覺饑欲食左右答言王
朝去時不被命勅令將廚宰卽時無食我聞是語已
走馬還宮教令索食王家廚監名修迦羅修迦羅言
卽無現食今方當作我時饑逼忿不思惟瞋怒迷荒
教勅傍臣斬殺廚監臣被王教卽共議言簡括國中
唯此一人忠良直事今若殺者更無有能爲王監廚
稱王意者時末利夫人聞王教勅殺修迦羅情甚愛
惜知王饑乏卽令辦具好肉美酒沐浴名香莊嚴身

體將諸妓女往至我所我見夫人莊束嚴麗將從妓女好酒肉來瞋心卽歇何以故末利夫人持佛五戒斷酒不飲我心常恨今日忽然將酒肉來共相娛樂展釋情故卽與夫人飲酒食肉作衆妓樂歡喜娛樂恚心卽滅夫人知我忘失怒意卽遣黃門輒傳我命令語外臣莫殺廚監卽奉教旨我至明日深自悔責愁憂不食顏色憔悴夫人問我何故憂愁爲何患耶我言吾因昨日爲餓火所逼瞋恚心故殺修迦羅自計國中更無有人堪監我廚如修迦羅者爲是之故悔恨愁耳夫人笑曰其人猶在願王莫愁我重問曰

爲實如是爲戲言耶答言實在非虛言也我令左右喚廚監來使者往召須臾將來我大歡喜憂恨卽除王白佛言末利夫人持佛五戒月行六齋一日之中終身五戒以犯飲酒妄語二戒八齋戒中頓犯六戒此事云何所犯戒罪輕耶重耶世尊答曰如此犯戒得大功德無有罪也何以故爲利益故如我前說夫人修善凡有二種一有漏善二無漏善末利夫人所犯戒者入有漏善不犯戒者名無漏善依語義者破戒修善各有漏善依義語者凡心起善名無漏善王白佛言如世尊說末利夫人飲酒破戒不起惡心而

有功德無罪報者一切人民亦復皆然何以故我念
近昔舍衛城中有諸豪族刹利公主因小諍競乃致
大怨各各結謀興兵相伐兩家並是國中豪強復是
親戚非可執錄紛紜鬪戰不從理諫深爲憂之復自
念言昔太子時先王大臣名提韋羅恃其門宗富貴
豪強而見輕慢形調戲弄劇於畜生當時忿恚情實
不分意欲誅滅力所不堪訴向父王復不聽省懷毒
抱恨非可如何以是之緣飲食損常懊惱愁悴爾時
太后見我愁苦種種諫曉愁故不息於時太后愛子
情重便遣使人求覓好酒勸我令飲卽白母言先祖

相承事那羅延天奉婆羅門今若飲酒懼恐天怒爲
婆羅門之所謫罰太后當時懼子致命於夜靜時關
閉宮門不令異人黃門婢使而得知者太后言夫天
神者有慈悲心救一切苦婆羅門者皆應如是子今
愁毒唐自失命天神豈能救子命耶寧當服藥消散
憂患得全身命諸婆羅門未得天眼安能知子隱密
事耶逼迫再三俛仰從之旣飲酒已忘失愁恨太后
見子還復顏色心卽歡喜召集宮女作倡妓樂三七
日中受五欲樂所追忿恨從是得息思惟是已卽勅
忠臣令辦好酒及諸甘餚又使宣令國中豪族羣臣

士民悉皆令集欲有所論國中大事諸臣諍競兩徒
眷屬各有五百等應召來集於王殿上莊嚴大樂王
勅忠臣辨瑠璃椀椀受三升諸寶椀中盛滿好酒我
於衆前先擎一椀王曰今論國大事想無異心坐此
會也今當人人辨此一椀甘露良藥然後論事咸言
唯諾奉大王命並勅伎官作娼妓樂諸人得酒並聞
音樂心中歡樂忘失仇恨沛然無憂王復持椀白諸
君曰士夫修德歷世相承遵奉聖教不應差違諸君
何爲因於小事忿諍如之若不忍者恐亾國嗣是故
重諫幸息諍事諸臣白王敬奉重命不敢違也因是

和平王白佛言諸人起諍不因於酒然因得酒息忿
諍心而得和平此豈非是酒之功也復次世尊察見
世間貧窮小人奴客婢使夷蠻之人或因節日或於
酒店聚會飲酒歡樂心故不須人教各各起舞未得
酒時都無是事是故當知人因飲酒則致歡樂心歡
樂時不起惡念不起惡念則是善心善心因緣應受
善報復次世尊獮猴得酒尚能起舞況於世人如世
尊說施善善報施惡惡報如世間人緣前布施福德
因緣今致大富貧者從乞慳惜不與慳貪因緣受餓
鬼報或有世人若男若女受形端正男人好者爲女

所愛女人好者男情所樂若有強力制斷男女不令合會不得合故則致憂苦此之殃罪當歸何處未利夫人皆由前身以好施人故今得好報世尊云何令持五戒月行六齋六齋之日不得莊嚴香華服飾又復不聽作倡妓樂又復不聽附近夫婿愛好之姿竟何所施徒亾其功豈非苦也佛告王曰大王所難非不如是未利夫人在年少時若我不勅令受戒法修智慧者云何當有今日之德以能得度復度王身如斯之功復歸誰耶未利夫人受我教故如說而行故使今日成就智慧方便解脫復次大王譬如世人家

有一子欲令成故及其幼年將詣學堂與師令教文藝書疏人望禮儀學堂之法皆有制令呵責杖罰禁節飲食不得睡眠出入行來不失節度有違犯者隨罪輕重計而行罰兒畏杖故專心就學至年大時高才博聞靡所不知復以所知轉教餘人未利夫人奉持齋戒亦復如是復次大王如富樓那嫉妒心故割斷恩愛辭別父母捨離妻子入山習學被服草衣忍寒耐苦自立誓言要當諷誦九十六種經書記論悉令通達不爾不還與父母相見足二十年一切通達還王舍城頭戴炬火以銅鑠腹陌上而行自唱稱言

我一切智來至我所謂我言你瞿曇沙門竟何所知
我言癡人而說頌曰

若有人智慧 不說人自知 如是多聞者
如日照世間 若多少有聞 自大以憍人
如人盲執燭 照彼不自明

時富樓那聞是語已霍然心悟捨炬解腹五體投地
慚愧悔過皆由多聞智慧諸根利故未起之頃斷三
界漏得羅漢道智慧之力譬如調象隨鉤而轉大王
當知夫習學者皆由禁制攝五情根然後通達無所
望礙名無礙智無礙智者具四辯也今富樓那具四

辯才皆由謙苦勤學所得是故我說夫慧解者有七
德財何謂爲七第一信財二精進財第三戒財四慚
愧財第五聞財六爲捨財七定慧財是爲七財末利
夫人具此七財大王當知末利夫人雖爲女身高才
智博非同凡人皆由少來慎身口意一心專念修習
智慧智慧力故名爲解脫復以智慧解悟天下爾時
世尊因羅睺沙彌爲諸大衆而說頌曰

聞爲金翼鳥 威勢武力強 聞爲行寶藏
所在相利益 聞爲大橋梁 濟度衆苦厄
聞爲大船師 濟度生死海 多聞令志明

以明智慧增 智則博解義 見聞行法安
多聞能除憂 能以定爲歡 善解甘露法
從是得泥洹 聞爲知律法 解疑亦見正
從聞捨非法 行到不死處 仙人敬事聞
諸天亦復然 檢心不放逸 積聞成聖智
慧能散憂恚 亦除非邪衰 欲求安隱吉
當奉事明者 盲從是得眼 如闇中得燭
開導世間人 如明將無目 是故應捨凝
離慢豪富樂 務學事明者 是名積聚德
爾時世尊說是偈已復告王曰王今福德聰朗博義

皆由前世親觀明師謙苦奉侍習學所致因緣果報
今爲人王智慧明達隨宜撫接世間難有是故我說
般若智慧有四種義是故當知求三乘人當學般若
欲離三惡八難苦患欲受人天快樂果報以要言之
求一切福德皆應修學智慧方便如我前說阿逸多
王勤苦學習智慧力故雖復失行生惡趣中常識宿
命識宿命故改惡修善速得解脫感致諸天濟接供
養以智慧力爲諸天師以是因緣我說般若有四種
義爾時波斯匿王聞佛所說智慧方便功德因緣甚
大歡喜太子祇陀夫人太后羣臣士民一切大衆莫

不解悟各各修敬爲佛作禮復坐如故王叉手曰如佛所言世人修善凡有二種一有漏善二無漏善有漏無漏二義歸一世尊云何說差別耶佛告王曰人有二器一者利根二者鈍根爲鈍根人說二種善利根之人不說二也所以者何衆源泉流終歸一海鈍根之人諸根闇塞是故爲說分別法耳爾時國王太子祇陀白佛世尊十善戒法有差別也同一義也妄語戒義一也多也若一義者終不可持若差品者願佛說之佛告之曰妄語有二一重二輕何謂爲重若受戒人不修智慧愚癡無智不能教化興隆佛法爲

是之故人所輕慢不得供養貧窮困苦爲供養故外現精進內行邪濁展轉相教宣向諸人比丘苦行精進得禪境界或言見佛見龍見鬼如是之人名大妄語犯是罪者墮阿鼻獄又復妄語能令殺人破壞人家復有妄語違失期契令他瞋恨如是名爲下妄語也行如是者名爲犯戒墮小地獄其餘調戲及諸私理匿禁之事或有言無或無言有不犯戒也太子祇陀聞說是已卽於佛前受十善道法白佛言世尊弟子今日疑悔已除發三菩提心願佛證知佛言善哉甚大歡喜宜知是時王白佛言如佛所說十方賢聖

明達衆生因緣果報者我父先王事外道修持禁戒絕於酒食五辛葱蒜供養梵天日月水火常行布施求梵天福年年常用千頭乳牛施婆羅門計四十年四萬頭牛請婆羅門食其乳酪生酥熟酥醍醐等味如斯功德生何天耶願佛垂哀分別教示令諸行者普得聞知佛告王曰前王果報今在地獄所以者何不值善時不遇善友無善方便雖修功德不得免罪布施之功不亾失也罪後畢時方當受福大王當知夫人修福不與罪合不共合故要須方便令得減罪何謂方便謂善知識何謂善友謂正見人是爲善友

常以正教調伏其心何謂正教謂觀無常苦空無我十二因緣縛著生死修四真諦見苦斷集證滅修道行六波羅蜜四無量心是爲方便調伏諸根根調伏故定慧成就慧成就故其心正直心正直故能起精進精進心故能起戒慎戒慎究竟定慧明了慧明了故遊諸萬行通達無礙行無礙故名爲解脫解脫心者卽涅槃也是則名爲善知識也大王當知明師善導是大因緣不可輕也大王今者遭賢遇聖皆由前世因緣果報聞法信解復能解人是故我說明人難值如不比有其所生處族親蒙慶是故當修般若智

慧王白佛言聞世尊說智慧方便皆已貫心如世尊說禍福不同我先帝大王有何惡業受苦報耶佛告王曰先帝大王有六種罪何謂六種一者傲慢垢弊事無麤細便起鞭罰不忍辱故二者貪受寶貨斷事不平致令天下懷怨恨故三者遊獵嬉戲苦困人民傷害衆生所愛命故四者禁閉宮女不得從意受大苦故五者耽著女色得新厭舊撫接不平致怨恨故六者畏婆羅門偷食酒肉五辛葱蒜恐被呵責行詭僞故是爲六事罪業因緣生地獄中王白佛言若是者佛未出時弟子亦有如斯之罪當如之何修十善行令得成就無滯礙也佛告王曰如我先說日光出時衆冥悉滅有餘闇不王曰燈火之光尚能滅闇況日光明威勢力也今王福德聞佛說法成就智慧喻若日光滅一切闇無餘罪也王白佛言我父所事婆羅門師精進智慧修習苦行爲求福故不惜身命或有投巖五熱炙身或斷飲食求生梵天或大積薪生自燒身或有翹腳張口向日或於高樹以繩繫腳而自倒懸或卧刺棘扶石壓胸有如是等種種苦行苦行之功德因緣歸何所耶佛答之曰如吾前說行苦苦報行樂樂報汝不聞乎王言世尊制諸弟子

令持禁戒非爲苦耶夫人饑時不卽得食煩惱橫起忿怒隆盛不自覺識起想懷害殺修迦羅如斯之事兩世受苦豈非惡也佛告王曰吾前所以制中前食者爲諸比丘捨外道法於我法中出家爲道先習苦行饑餓心故得諸弟子肥美飲食貪食過飽食不消故則致衆病是故制食非爲饑苦求福德也又節食者見諸比丘縱橫乞食無有晝夜食無時節爲諸外道之所譏責而作是言瞿曇沙門自言道精何以不如外道法也是故節食非於饑苦而求福也以要言之所制禁戒正爲癡人無方便慧非爲智人知時宜

也如我前說般若智慧卽是解脫智者所受聖所行處王聞是已益加歡喜更起恭敬爲佛作禮一切大衆聞佛所說疑網結解猶如日光消除闇冥得見大明如此之功其恩難報諸弟子等當以何方施設供養報今世尊斯重恩也佛告王曰及諸會衆甘露法教其功難報假令有人於恒沙劫盡心奉事佛法聖衆衣食臥具疾病醫藥於意云何其福多不王曰甚多不可稱量佛告王曰甘露法者精妙難量濟無麤細非天世人福德之力所能報也唯有一事能報佛

恩何謂爲一常以慈心以其所解一切善法展轉開化乃至一人令其信心成就智慧展轉教化無有窮盡譬如一燈然無量燈如是行者乃名爲報師徒重恩大王當知欲報師徒解脫恩者還以智慧解度衆生如是行者則爲供養三世諸佛非但供養報一師也王又手曰宣傳聖教開悟羣生令行正見修習聖道其福云何唯願垂哀開導衆生佛告王曰若善男子善女人從師聞法一句一義展轉教化乃至一人未信令信未解令解如是功德無量無邊非是凡夫所能知也大王假使有人於千歲中飲食醫藥上妙衣服供養恭敬佛法聖衆其福多不王言甚多不可稱量佛告大王善男子善女人從師聞說諸佛正教展轉教化乃至一人令其信解其所得福復過於彼

千萬億倍不及其一何以故法化之功應無量故佛告阿難如此法教精勤宣化一切人民其福無量阿難我今以此無上妙法付囑於汝宣布教化過度衆生則爲供養一切諸佛阿難又手白世尊曰佛囑此經當何名之佛告阿難此經教者名未曾有說因緣經當勤修行爾時波斯匿王祇陀太子夫人後宮四部弟子釋梵諸天八部龍神八十萬人聞佛所說皆

大歡喜各各發心向三脫門禮佛辭退如法奉行
未曾有因緣經卷下

音釋

婿

女之夫

葱蒜

葱倉紅切

蒜蘇貫

搏

伯各切

杌

杌革於

與

其俱切

毬

龍珠切

毬

毬吐盍切

毬

毬毛孽之細

同

毬毛席也

毬

毛布也

毬

毬

毬

毬

綻

綻綻于阮切

綻

綻以然

綻

綻坐

綻坐

綻

綻

綻綻胡困切

綻

經

經

經

經

經

韻

韻韻鳥名

韻

韻廁也

韻

韻憔悴

韻憔悴

韻枯瘠貌

韻

韻

韻韻以輒切

韻

韻銅

韻徒奚切

韻

韻酬戶吳切

韻

韻

韻

韻韻鐵薄也

韻

韻

韻

韻

韻

韻

韻

韻

韻居士王鏡施賈刻此

韻

韻

韻

韻

韻

韻

韻

韻

韻經下卷爲

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

韻

十六十